


文
粹

16
338
2



利
291
2



文粹卷弟七

古賦七 總一十四首

鳥獸昆蟲

大鵬賦 李白

鵬賦 杜甫

白鷗賦 蕭穎士

白鸚鵡賦 王維

感二鳥賦 韓愈

白羽扇賦 張九齡

玄猿賦 吳筠

塵尾賦 陳子昂

由鹿賦 呂溫

蠶賦 陸龜蒙

吳興 姚鉉 纂



文粹七

秋蟲賦 羅隱

蝨賦 李商隱

後蝨賦 陸龜蒙

蝎賦 李商隱

大鵬賦 并序

李白

余昔於江陵口見天台司馬子微謂余有仙風道骨可與神游八極之表因著大鵬遇希有鳥賦以自廣此賦已傳于世往往人間見之悔其少作未窮宏達之旨中年棄之及讀晉書觀阮宣子大鵬讚鄙心陋之遂更記憶多將舊本不同今復存于集豈敢傳諸作者庶可示之子弟而已其辭曰

南華老仙發天機于漆園吐崢嶸之高論開浩蕩之奇言徵志怪于齊諧談北溟之巨魚吾不知幾千里其名曰鯤化成大鵬質凝胚渾脫修鬣于海島張廣翅于天門刷渤澥之春流晞扶桑之朝暾赫奕乎宇宙憑凌乎崑崙一鼓一舞煙矇沙昏五嶽為之震蕩

百川為之崩奔爾乃蹶厚地摩太清互層霄突重溟激三千以崛
起搏九萬而迅征背業太山之崔嵬翼舉垂雲之縱橫左迴右旋
倏陰忽明歷汗漫以天矯狃閭闔之崢嶸簸鴻濛扇雷霆斗轉而
天動山搖而海傾怒無所搏雄無所爭固可想象其勢髣髴其形
若乃足縈虹蜺日耀日月連軒沓拖揮霍翕忽噴氣則六合生雲
灑毛則千里飛雪邈彼北荒將窮南圖運逸翮以傍擊鼓奔飈而
長驅燭龍銜光以照影列缺施鞭而啟塗塊視三山杯觀五湖其
動也神應其行也道俱任公見之而罷釣有窮不敢以彎弧莫不
投竿失鏃仰之長吁爾其雄姿壯觀映背河漢上摩蒼蒼下覆漫
漫盤古開天而直視羲和倚日以傍歎續紛乎八荒之間掩映乎
四海之半當曾臆之掩晝若混茫之未判忽騰覆以迴旋則霞廓
而霧散然後六月一息至于海湄歛翳景以橫翥逆高天而下垂
憩乎泱泱之野入乎汪洋之池猛勢所射餘風所吹溟漲沸渭巖
嶽紛披天吳為之怵慄海若為之躩踞巨鼇冠山而卻走長鯨騰

海而下馳縮殼挫鬣莫之敢窺吾亦不測其神怪之若此蓋乃造化之所爲豈比夫蓬萊之黃鵠誇金衣與菊裳恥蒼梧之玄鳳耀綵質與錦章旣服御于靈仙亦馴擾于池隍精衛殷勤于銜木鷄鷓悲愁乎薦觴天雞警曙于蟠桃跋烏炳耀于太陽不曠蕩而縱適何拘攣而守常未若茲鵬之逍遙無厥類乎比方不矜大而暴猛每順時而行藏參玄根以比壽飲元氣以爲漿戲陽谷而徘徊憑炎洲而抑揚俄而希有鳥見而謂之曰偉哉鵬乎若此之樂也吾右翼掩乎西極左翼蔽乎東荒跨躡地絡周旋天綱以恍惚爲巢以虛無爲場我呼爾游爾同我翔於是大鵬許之欣然相隨此二禽已登于寥廓而尺鷃之輩空見笑于藩籬

鵬賦 并進表

杜甫

臣甫言臣之近代陵夷公侯之貴磨滅鼎銘之勳不復照耀於明時自先君恕預以降奉儒守官未墜素業矣亡祖故尚書膳部員外郎先臣審言修文於中宗之朝高視於藏書之府故天下學士

到于今而師之臣幸賴先臣緒業自七歲所綴詩筆向四十載矣約千有餘篇今賈馬之徒得排金門上玉堂者甚眾矣唯臣衣不蓋體常寄食於人奔走不暇祇恐轉死溝壑安敢望仕進乎伏惟明主哀憐之儻使執先祖之故事拔泥塗之久辱則臣之述作雖不足以鼓吹六經先鳴數子至於沈鬱頓挫隨時敏捷而揚雄枚皋之流庶可跂及也有人如此陛下其舍諸伏惟明主哀憐之無令役役便至於衰老也臣甫誠惶誠恐稽首頓首死罪死罪以爲鵬者鷲鳥之殊特搏擊而不可當豈但壯觀於旌門發狂於原隰引以爲類是大臣正色立朝之義也臣竊重其有英雄之姿故作此賦實望以此達於聖聰耳不揆蕪淺謹投延恩匭進表獻賦以聞謹言

當九秋之清淒見一鶚之直上以雄材爲己任橫殺氣而獨往捎捎勁翮肅肅遺響杳不可追俊無畱賞彼何鄉之性命碎今日之指掌伊鷲鳥之累百敢同年而爭長此鵬之大略也若乃虞人之

所得也必以氣稟玄冥陰乘甲子河海蕩瀟風雲亂起雪沍山陰
冰纏樹死迷向背於八極絕飛走於萬里朝無以充腸夕違其所
止頗愁呼而蹭蹬信求食而依倚用此時而椽杙待弋者而綱紀
表狎羽而潛窺順雄姿之所擬欵捷來於森木固先繫於利觜解
騰攫而竦神開網羅而有喜獻禽之課數備而已及乎閩隸受之
也則擇其清質列在周垣揮拘攣之掣曳挫豪梗之飛翻識畋游
之所使登馬上而孤騫然後綴以珠飾呈於至尊搏風槍梟用壯
旌門乘輿或幸別館獵平原寒蕪空闊霜仗喧繁觀其夾翠華而
上下卷毛血之崩奔隨意氣而電落引塵沙而晝昏豁堵牆之榮
觀棄功效而不論斯亦足重也至如千年孽狐三窟狡兔恃古塚
之荆棘飽荒城之霜露回惑我往來趨起我場圃雖青皎戴角白
鼻如瓠蹙奔蹶而俯臨飛迅翼以遐寓而料全於果見迫窺遽屢
攬之而穎脫便有若於神助是以嘵哮其音颯爽其慮續下鞞而
繚繞尙投跡而容與奮威逐北施巧無據方蹉跎而就擒亦造次

而難去一奇卒獲百勝昭著夙昔多端蕭條何處斯又足稱也爾
其鶴鴟鴟之倫莫益於物空生此身聯拳拾穗長大如人肉多
奚有味乃不珍輕鷹隼而自若託鴻鵠而爲鄰彼壯夫之慷慨假
強敵而逡巡拉先鳴之異者及將起而遄一作復臻忽隔天路終辭
水濱寧掩羣而盡取且快意而驚新此又一時之俊也夫其降精
於金立骨如鐵目通於腦筋入於節架軒楹之上純漆光芒掣梁
棟之間寒風凜冽雖趾躄千變林嶺萬穴繫叢薄之不開突杈柯
而皆折此又有觸邪之義也久而服勤是可呀畏必使烏攫之黨
罷鈔盜而潛飛梟怪之羣想英靈而遽墜豈非虛陳其力叨竊其
位等摩天而自安與槍榆而無事者矣故不見其用也則晨飛絕
壑暮起長汀來雖自負去若無形置巢截窠養子青冥俟爾年歲
茫然闕廷莫試鈎爪空迴斗星眾雛儻割鮮於金殿此鳥已將老
於巖扃

白鷗賦并序

文萃七

蕭穎士

白鷗羽族之幽奇也素質黑章爪背純丹體備冠距頗類夫雞翟神兒清閑不雜於眾禽栖止遐深與人境罕接固莫得而馴狎也上聞而徵焉處以雕籠致以駟騎是將集長楊游太液行有日矣天寶辛卯歲予旅泊江會流宕逾時秋八月自山陰前次東陽方議夫南登西泛極聞見之義諒褊懷所素蓄而未之從也會有命自天台召赴京闕適與茲鳥偕至于會稽之傳舍觀其宛頸旁睨徊徨掩抑往往孤鳴音韻淒涼如慕侶而不獲因感而賦之曰鳥之生矣于彼南山彩乏玄素文不綺斑備文武之正飾微妖姬之殊顏情莽眇以耿絜兒軒昂以安閑無馴擾之近性故不愜於人寰游必海裔栖必雲間冀養拙以自保祛未萌之憂患不然豈陋彼都邑之佳麗顧投身乎阻艱以其標自然之靜故名之曰白鷗者歟何天聽之緬邈辱微禽之瑣細偶一日之見羈委微軀以受制望層城以斂翼懷眾侶而孤唳從廢置之駿奔仰君門以遐逝君門兮九重洞杳窅兮穹崇池太液兮島方壺萬族翔泳乎其

中晝聒未央之繁弦夕警長樂之靈鐘顧疏野之賤迹豈敢求一枝而見容越水清兮鏡色吳山遠兮天逼窺深淺以颺影逗杳冥兮一息謂杉松可得永日而噪聚葍苜足以窮年而啜食一與心賞兮睽違念歸飛兮何極鷗能言而入座鶴善舞而登軒殊二者之俗態諒慚惶於主恩是以雖信美而非其志獨屏營而兢魂者焉

白鷗賦

以容日上海孤飛色媚為韻

王維

若夫名依西域族本南海同朱喙之清音變綠衣於素彩惟茲鳥之可貴諒其美之斯在爾其入翫於人見珍奇質狎蘭房之伎女去桂林之雲日易喬枝以羅袖代危巢以瓊室慕侶方遠依人永畢託言語而雖通顧形影之非匹經過珠網出入金鋪單鳴無應隻影長孤偶白鷗於池側對皓鶴於庭隅愁混色而難辨願知名而自呼明心有識懷恩何極芳樹絕想雕梁撫翼時銜花而不言每投人以方息慧性孤寡雅容非飾含火德之明輝被金方之正

色至如海鷺呈瑞有玉筐之可依山雞學舞向寶鏡而知歸皆羽
毛之偉麗奉日月之光輝豈憐茲鳥地遠形微色凌紈質彩奪繒
衣深籠久閉喬木長違儻覓借其羽翼與遷鶯而共飛按原限八韻制本不限全韻

感二鳥賦并序

韓愈

貞元十一年五月戊辰愈東歸癸酉自潼關出息于河之陰時始
去京師有不遇時之歎見行有籠白鳥白鸚鵡而西者號於道曰
某土之守某官使使者進於天子東西行者皆避路莫敢正目焉
因竊自悲幸生天下無事時承先人之遺業不識干戈攻守未耜
耕穫之勤讀書著文自七歲至今凡二十二年其行己不敢有愧
於古人之道其閒居思念前古當今之故亦僅志其一二者焉
選舉於有司與百人偕進曾不得薦書齒下士于朝以仰望天
子之光明今是鳥也惟以羽毛之異非有道德智謀承顧問贊教
化者乃反得蒙採擢薦進光耀如此故為賦以自悼且明夫遭時

者雖小善必達不遭時者累善無所容焉其辭曰

吾何歸乎吾將既行而後累思誠不足以自存苟有食其從之出
國門而東驚觸白日之隆景時返顧以流涕念西路之逾永過潼
關而坐息窺黃流之奔猛感二鳥之無知方蒙恩而入幸惟進退
之殊異增予懷之耿耿彼中心之何嘉徒外飾焉是逞予生命之
湮阨曾二鳥之不如汨東西與南北恆十年而不居辱飽食其有
數況策名于薦書時所好之為賢庸有謂余之非愚昔殷之高宗
得良弼於宵寐孰左右者為之先信天同而神比及時運之未來
或兩求而莫致雖家到而戶說祇招尤而速累蓋上天之生余亦
有期於下地盍求配於古人獨惴惴於無位惟得之而不能乃鬼
神之所戲幸年歲之未暮庶無羨於斯類

白羽扇賦并序

張九齡

開元二十四年夏盛暑奉勅遣大將軍高力士賜宰臣白羽扇九
齡與焉竊有所感立進賦曰

當時而用任物所長彼鴻鵠之弱羽出江湖之下方安知煩暑可致清涼豈無紈素彩畫文章復有修竹剖枿豪芒提攜密邇搖動馨香惟眾珍之在御何短翮之敢當與竊恩於聖后且見持於未央伊昔皋澤之時亦有雲霄之志苟效用之得所雖殺身而何忌肅肅白羽穆如微風縱秋氣之移奪終感恩於篋中

玄猿賦并序

道士吳筠

前志稱周穆王南征君子變為猿鶴小人變為蟲沙夫神用無方未必不爾筠自入廬嶽則觀斯玄猿嘉其雨昏則無聲景霽則長嘯不踐土石超遙於萬木之間春咀其英秋食其實不犯稼穡深棲遠處猶有君子之性異乎狙獠之倫且多難已來庶品彫敗麋鹿殫於網罟遺氓困於誅求此獨蕭然物莫能患豈不以託蹟覓絕不才遠禍昔夫子歎山梁雌雉曰時哉時哉予因感之聊以作賦云爾

伊玄猿之所育于南國之曾岑動不踐地居常在林雖泛泛而無

據亦熙熙而有心零嵐昏而共默風雨霽而爭吟使幽人之思清暢羈客之涕霑襟何必聆嶰谷之管對雍門之琴哉歷千尋之喬木俯萬仞之危嶠弄游雲之亂飛嬉落日之橫照連肱澗飲命侶煙嘯或聚而間棲或分而迴趨壽同靈鶴性合君子阻重巖之險非虎豹所履蔭交柯之密豈鵬鶚能視故逢蒙操弓憚高深而止鄧公折箭含惻隱而已何患累之罕臻不干物以利己詎若狒狒凌人以就戮猩猩甘酒而遄死夫時珍貂裘世寶狐白徒能工於隱伏終見陷於機辟麝懷香以賈害狙伐巧而招射小則翡翠殞於毛羽大則犀象殘於齒革孰能去有用之損取無用之益因弃置於常情永逍遙以自適無威刑以相臨有族類而相親食資諸物衣取諸身不賦不役靡勞靡勤如政教之未施保巢居之涓涓匪虞氏之所及何狙公之能馴吾固知人為萬物之貴又焉測元化之所謂大鈞乎

塵尾賦并序

陳子昂

甲子歲天子在洛陽時余始解褐守祕書省正字太子司直宗秦
客置酒於金谷亭大集賓客酒酣共賦座上食物命余爲麀尾賦
焉

天之浩浩兮物亦云云性命變化兮如絲之棼或以神好正直天
監默默或以道惡強梁天亦茫茫此仙都之靈獸因何負而罹殃
始居幽山之藪食乎豐草之鄉不害物以利己每營道而同方何
忘情以委代而任性之不忘卒罟網以見逼受庖割而罹傷豈不
以斯尾之有用而殺身於此堂爲君雕俎之差厠君金盤之實承
主人之嘉慶對象筵與寶瑟雖信美於茲辰詎同歡於疇日客有
感之而歎曰命不可思神亦難測吉凶悔吝未始有極借如天道
之用莫神於龍受戮爲醢不知其凶王者之瑞莫聖於麟遇害於
野不知其仁神旣不能自智聖亦不能自知況林棲而谷走及山
鹿與野麋古人有言天地之心其間無巧冥之則順動之則天諒
物情之不異我心又何競於猜矯故曰天之神明與物推移不爲

事先動而輒隨是以至人無己聖人不知子欲全身而遠害曾是
浩然而順斯

由鹿賦并序

呂溫

貞元丁卯歲按集作己卯當貞元十五年溫予南出襄樊之間遇
以貞元未權第則從己卯爲是野人繫鹿而至者問之答曰此爲由鹿由此鹿以誘致羣鹿也備
言其狀且曰此鹿每有所致輒嗚嗥不飲食者累日余喟然歎曰
虞之卽鹿也必以其類致之人之卽人也亦必以其友致之實繁
有徒從古然矣嗟乎鹿無情而猶知痛傷人之與謀實安殘酷者
彼何人斯彼何人斯物微感深遂作賦曰
鹿之生兮亦稟亭毒備齒角以無競循性情而自牧姑有昧於行
止尙焉知乎倚伏捨爾崇林輕游近麓偶巧網之生致蒙主人之
全育飲以溲井飼于芳庭寢卧荃柔騰倚蘭馨露往霜來日安月
寧雖矯性之非樂終感恩而不驚曾不知養非玩物用有深意命
之曰由俾陷其類涼秋八月爽景清氣羈致山阿縻于蹊隧設伏

以待翳叢而伺同氣相求誘之孔易將必慕侶豈云貪餌啣吻和
鳴慶慶狎至彼泯慮於猜信此無情於誠偽孰是倉卒禍生所忽
毒鏑歛以星貫潛機劃其電發或洞胷而達腋或折足而碎骨望
林巒兮非遠顧町疇兮未滅風嗥澤而北至日掩山而西沒走駭
侶於巖煙叫饑靡於澗月苟行路之聞者孰不心摧而思絕相爾
由矣野心而仁望純束而驚顧隨獲車兮逡巡視鼎中之銷爛觀
机上之剖分忽哀鳴以感類若沈痛之在身雖復處之密邇享以
豐珍比檻猿之駭躍同海鳥之愁辛敢擇音而後死思走險以何
因痛無知以相陷含怨毒而莫伸客有感而言曰物誠有諸人亦
宜乎撫事或比原心則殊借如淮陰構禍寃在伸理通說且拒豨
謀寧起堂堂蕭公實曰知己給致鍾室胡寧忍此呂祿之難誰非
漢臣交則不義賣亦不仁彼美鄴生既為交親誘襲軍印豈無他
人於戲微獸傷類如不自容伊人賣友而享其功滅交道兮墜義
風曾糜鹿之不若何仁信之可宗已焉哉諒此世之茫茫吾未見

其始終

蠶賦并序

陸龜蒙

荀卿子有蠶賦楊泉亦為之皆言蠶有功於世不斥其禍於民也
余激而賦之極言其不可能無意乎詩人碩鼠之刺於是乎在
古民之衣或羽或皮無得無喪其游熙藝麻緝纊官初喜窺十
奪四五民心乃離逮蠶之生繭厚絲美機杼經緯龍鸞葩卉官涎
益嚙盡取後已嗚呼既豢而烹蠶實病此伐桑滅蠶民不凍死

秋蟲賦并序

羅隱

秋蟲蜘蛛也致身網羅閒實腹亦網羅閒愚感其理有得喪因以
言賦之
物之小兮迎網而斃物之大兮兼網而逝網也者繩其小而不繩
其大吾不知爾身之危兮腹之餒兮吁

蝨賦

李商隱

亦氣而孕亦卵而成晨鷺露鳴不知其生汝職唯齧而不善齧回

臭而多跖香而絕

後蝨賦 并序

陸龜蒙

余讀玉谿生蝨賦有就顏避跖之歎似未知蝨作後蝨賦以矯之
衣緇守白髮華守黑不為物遷是有恆德小人趨時必變顏色弃
瘠涵腴乃蝨之賊

蝨賦

李商隱

夜風索索緣隙憑壁弗聲弗鳴潛此毒螫厥虎不翅厥牛不齒爾
兮何功既角而尾

文粹卷第七

文粹卷第八

吳興 姚鉉 纂

古賦八 總七首

古器

霜鐘賦 喬潭

敲器賦 李德裕

砥石賦 劉禹錫

物景

晚晴賦 杜牧

秋聲賦 劉禹錫

決疑

問大鈞賦

何卜賦

霜鐘賦 并序

喬潭

南陽有豐山山有鐘霜降則鳴斯氣感而應也潭忝預少宗伯達
 奚公特達之遇擢秀才甲科庶幾人閒有是譽處按斯氣至譽處
 三十二字從文
 苑英華補入然南陽則公隱居之舊地也故為霜鐘賦以廣知音焉
 豐山之峰巉岳積翠之石森爽凌寒之松上無飛鳥下無人蹤深
 杳杳以靜謐有天然之古鐘兩樂神資九乳靈化寧失制於侈弁
 豈遺音於窈窕每簾器以自閑常宿懸而不下動於耳而藏於心
 必高秋之涼夜於是次寥兮日暮而天晶蕭瑟兮霜落而風清爽
 氣無朕潛來滿盈跳然復出鏗爾有聲信不擊而不考能大鳴而
 小鳴始則函胡擁鬱旋復充誦紆閒若往若還徘徊其間爾其舒
 肆奔放長樂遠暢乍浮空以紆餘更觸物而瀏亮入林蕭蕭在水
 湯湯泛濫小瀨聯縣疏篁夜鶴怨兮彌苦寒猿悲兮更長餘韻春
 容隨風悠揚繞於洞庭浮於瀟湘梧楸紛以離披蒹葭颯其蒼蒼
 及夫夜以艾兮彌靜山無人兮月冷初肅肅以自淒復琅琅而虛
 警其動愈出其來甚徐合於元化游於太虛轉遠而盡誰知所知

聊獨立以傾聽惘若失乎躊躇聽不及想以存其餘方其寒氣曉
 集鏘然應急發越林巒周流井邑前聲未盡後韻相及羈臣之空
 館屢來思婦之高樓偏入無不俚然驚夢歔歔掩泣夫鐘之應霜
 也應以無心士之知己也貴知其音不鼓而鳴者其聲遠不言而
 信者其分深故自然之聲無假於煩手特達之分不資於滕口吾
 欲徵華鐘喻良友懷音淵默藏器虛受可以適南陽待清霜之一
 扣系曰風籟起兮喧長薄霜鐘鳴兮動哀壑合大塊兮聲無作雖
 有聞兮常寂寞

敬器賦并序

李德裕

癸丑歲余時在中樞丞相路公見遺敬器贈以古人之物永懷君
 子之心嘗欲報以辭賦屬力小任重朝夕盡瘁固未暇於體物今
 者公已沒世余又放逐忽覩茲器悽然懷舊因追為此賦置公之
 靈筵
 昔周道砥平既安且寧赫赫公且配德阿衡謂難守者成難持者

盈始作茲器告于神明至仲尼憲文武之道思周公之德入太廟而觀器見遺法而歎息且日月滿而虧日中則昃彼天道之常然欲久盛而焉得乃沃水於器察微要終挹彼注茲授之若沖虛則艱脆似君子之困蒙中則端平如君子之中庸滿則傾跌靈流電發器如隄隤水若河決非神鼎之自盈異衢樽之不竭蓋欲表人道之隆替明百事之有節然茲器也不以中而自藏不以跌而自傷其過也如彼薄蝕其更也浸彼輝光得其道者居則念於豐蔀動乃思於謙受顏既復而不遠惠屢黜而何咎知任重之必及悟物盈之難久雖神道之無形常慘然於前後昔與君子同秉國鈞公得之爲賢相余失之爲放臣覩遺物而猶在懷舊好而悲辛思欲克己以復禮永報德於仁人

砥石賦

并序

劉禹錫

南方氣泄而雨淫地慝而傷物媪神噫溼淪色壞味雖金之堅亦失恆性始余有佩刀甚良至是澁不可拔剖其室乃出邈陽眇眩

傳刃蒙春鱗然如疴痂如黑子如青蠅之惡銳氣中錮猶人被病然客有聞焉哀密石以遺予沃之草腴雜以烏膏切劇下上真質焯見躊躇四顧道爾謝客微子之貽幾喪吾寶客曰吾聞諸梅福曰爵祿者天下之砥石也高皇帝所以礪世摩鈍有是耶余退感其言作砥石賦

我有利金兮以利爲佩遭土卑而慝作兮雄鉞爲之潛晦如景昏而蝕旣兮與肌漆而爲癘顧秋蓬之不可剗兮尚可游乎髓髀之外利物蒙蔽材人惆悵俾百沃之至精蟠一檢而多恙豈害氣之獨然兮將久不試而然彼屠者之刀兮獵者之鋌不灌不淬兮糅錯銜鈎日鼓月揮兮剗腴擊鮮睨燿燿以耀芒莠淫夷而騰羶豈不涉暑而蒙沴兮鼎用之而成妍有客自東遺余越砥圭形石質蒼色膩理剗其鱗皴滑以滌滄如衣澣垢如鼎出否霧盡披天萍開見水拭寒燄以破昔擊清音而振耳故態復還寶心再起旣賦形而終用一蒙垢焉何恥感利鈍之有時兮寄雄心於瞪視嗟乎

石以砥焉化鈍爲利法以砥焉化愚爲智武王得之商俗以厚高
帝得之傑材奔走得既有自失豈無因漢氏已還三光景分隨道
闕狹用之得人五百餘年唐風始振懸此天砥以礪兆民播生在
天成器在君天爲人君君爲人天安有執礪世之具而患乎無賢
歟

晚晴賦并序

杜牧

秋日晚晴樊川子目于郊園見大者小者有狀類者故書賦云
雨晴秋容新沐兮忻遶園而細履面平池之清空兮紫閣青橫遠
來照水如高堂之上見羅幕兮垂乎鏡裏木勢黨伍兮行者如迎
偃者如醉高者如達低者如跛松數十株切切交峙如冠劍大臣
國有急難庭立而議竹林外裏兮十萬丈夫甲刃縱縱密陣而環
待豈負軍令之不敢囂兮何意氣之嚴毅復引舟于深灣忽八九
之紅芰姍姍如婦斂然如女墮藥黥顏似見放棄白鷺潛來兮逸
風標之公子窺此美人兮如慕悅其容媚雜花參差於岸側兮終

綠黃紫格頑色賤兮或妾或婢閒草甚多叢者束兮靡者杳兮仰
風獵日如立如笑兮千千萬萬之容兮不可得而狀也若予者則
謂何如倒冠落佩兮與世闊疏敖敖休休兮真徇其愚而隱居者
乎

秋聲賦并序

劉禹錫

相國中山公賦秋聲以屬天官太常伯唱和俱絕然皆得時行道
之餘興猶動光陰之歎况伊鬱老病者乎吟之斐然以寄孤憤
碧天如水兮宵宵悠悠百蟲迎暮兮萬葉吟秋欲辭林而蕭颯潛
命侶以啁啾送將歸兮臨水非吾土兮登樓晚枝多露蟬之思夕
草起寒蟬之愁至若松竹含韻梧楸早脫驚綺疏之晚吹墜碧砌
之涼月念塞外之征行顧閨中之騷屑夜蛩鳴兮機杼促朔鴈叫
兮音書絕遠杵續兮何洽洽虛室靜兮空切切如吟如嘯非竹非
絲合自然之宮徵動終歲之別離廢井苔合荒園露滋草蒼蒼兮
人寂寂樹檝兮蟲伊伊則有安石風流巨源多可平六符而佐

主施九品而自我猶復感陰蟲之鳴軒歎涼葉之初墮異宋玉之
悲傷覺潘郎之么麼嗟乎驥伏櫪而已老鷹在韝而有情聆朔風
以心動盼天籟而神驚力將瘳兮足受繼猶奮迅于秋聲

問大鈞賦并序

始余失臺郎為刺史又貶州司馬俟罪朗州三見閏月人咸曰數
之極理當遷焉因作謫九年賦以自廣是歲臘月詔追明年自闕
下重領連山郡印綬咸曰美惡周必復第行無恤歲杪其復乎居
五年不得調歲二月有事于社前一日致齋孤居慮靜滯念歎起
伊人理之不可以曉也將質諸神乎謹貢誠馳精敢問大鈞其夕
有遇寤而次第其辭以為賦

圓方相函兮浩其無垠宵冥翕闢兮三辰以騰振孰主張是兮有
工其神迎隨不見兮強名之曰大鈞敬以臨下兮巍乎雄尊天為
獨陽高不可問工居其中與人差近身執其權心平其運循名想
象或可以訊曰嘻蒙之未生其猶泥爾落乎埏埴唯鈞所指忽然

為人為幸大矣工賦其形七情與俱嗇智不授昇去之以愚坦坦
之衢萬人所趨蒙一布武化為畏途人或譽平之百說徒虛人或
排之半言有餘物壯則老乃唯其常否終則傾亦不可長老先期
而驟至兮否踰數而叵量雖一夫之不獲兮亦大化之攸病謹薦
誠上問兮俛伏以聽是夕寢熟夢游乎無何有之鄉抗陛級乎重
霄兮異人間之景光中有威神巾金甲而焯煌命之使前兮其音
琅琅曰吾大化之一工也居上臨下廉其不平汝今有辭吾一以
聽播形肖貌生類積億橐籥圈匡鎔鍊消息我之司智初不爾嗇
不守以愚覆為汝賦既賦汝形輔之聰明盍求世師資適攸宜胡
然抗心遐想前烈倚梯青冥舉足斯跌韜爾智斧無為自伐鑿窟
太繁天和乃洩利逕前誘多逢覆轍名腸內煎外火非熱今哀汝
窮將厚汝愚剔去剛健納之柔濡塞前竅之傷痍兮招太和而與
居貴以待人兮急以自拘道存邃奧無示四隅軋物之勢不作兮
見傷之機自無汝不善用吾焉嗇乎且夫貞而騰氣者臚臚健而

垂精者吳吳我居其中猶輪是蹈以不息爲體以日新爲道保鱗
蜚走灌莽苞阜乃牙乃甲乃殪乃剖陽榮陰悴生濡死藁各乘氣
化不以意造賦大運兮無有淑惡彼多方兮自生醜好爾奚不德
余以驟壯姑尤我以速老耶觀汝百爲又或不然赤子哇哇忽其
能言亦既各物幾時踟躕春耕其邱投種之日釋耒而歎何時實
粟望所未至謂余舒舒欲其久畱謂我譬如我一子二誰之曲歎
彼蒹葭之蒼蒼兮霜霰苦而中堅松竹之皴皴索籜兮不若櫛笄
之可憐納材葦而構明堂兮固容消而力完揚且之哲兮不可以
常然當錫爾以老成蒼眉皓髯山立時行去敵氣與矜色兮噤危
言以端誠俾人望之侮黷不生爾之所得孰與壯多不善處老問
余而何受教而迴遠遽形開嚮之威神孰爲來哉乃遽衣促盥端
慮滌想委佩低簪特簿叩顙而言曰楚臣天問不訓今臣過幸一
獻三售始厚以愚終期以壽忘上問之罪濯已然之咎心增故術
腸飽新授馳神清立拜手稽首

何卜賦

余旣幻惑力命之說兮身久放而愈疑心回穴其莫曉兮將取質
夫秉龜楚人俗巫而好術兮叟有鬻卜而來思乃招而訊之曰嘻
人莫不塞有時而通伊我兮久而愈窮人莫不病有時而閒伊我
兮久而滋蔓吾聞人肖五行動止有則四時轉續變於所極一歲
之早人斯具舟三月之熱人斯具裘極必反焉其猶合符予首圓
而足方予腹陰而背陽胡形象之有肖而變化之殊常經曰剝極
則賁居賁而未嘗剝者其誰否極受泰居否而未嘗泰者又其誰
鶴胡不截鳧胡不裨夔何罰而蹠蹠何功而扶持紛紜恣睢交
作舛馳似與似奪似信似欺孰主張之問于子龜卜者曰招我以
粗問我以微有天下之是非有仁人之是非在此爲美兮在彼爲
蚩或昔而成或今而虧君問曷由主張其時乎時乎去不可邀
來不可逃淹兮口口孰舍孰操豕喙之毒莖雞首之賤毛各於其
時而伯音霸其曹屠龍之伎非曰不偉時無所用莫若履豨作俑之

工非曰可珍時有所用貴于斷輪絡首縻足兮驥不能跬前無所
阻兮跛鼈千里同涉于川其時在風沿者之吉沂者之凶同藝于
野其時在澤伊種之利乃穆之厄故曰是耶非耶主者時耶諒淑
惡之同出兮顧所丁之若何夫如是得非我美失非我恥其去曷
思其來曷期姑蹈常而俟之夫何卜爲言訖執龜而起予退而作
何卜賦於是蹈道之心一而俟時之志堅內視羣疑猶冰釋然

文粹卷第八

文粹卷第九

古賦九 總一十首

吳興 姚鉉 養

修身

動靜交相養賦 白居易

哀樂愁思

懷忠賦 歐陽詹

泛渭賦 白居易

望賦 劉禹錫

惜餘春賦 李白

江上愁心賦 張說

別知賦 韓愈

愛而不見賦 蕭穎士

傷往賦 劉禹錫

夢

夢渴賦何賦

動靜交相養賦并序

白居易

居易常見今之立身從事者有失於動有失於靜斯由動靜俱不得其時與理也因述其所以然用自儆導命曰動靜交相養賦云天地有常道萬物有常性道不可以終靜濟之以動性不可以終動濟之以靜養之則兩全而交利不養之則兩傷而交病故聖人取諸震以發身受以復而知命所以莊生曰智養恬易曰蒙養正者也吾觀天文其中有程日明則月晦日晦則月明明晦交養晝夜乃成吾觀歲功其中有信陽進則陰退陽退則陰進進退交養寒暑乃順且躁者本於靜也斯則躁為民靜為君以民養君教化之根則動養靜之道斯存且有者生於無也斯則無為母有為子以母養子生成之理則靜養動之義明矣所以動之為用在氣為春在鳥為飛在舟為楫在弩為機不有動也靜將疇依所以靜之

為用在蟲為蟄在水為止在門為楗在輪為柅不有靜也動奚資始則知動兮靜所伏靜兮動所倚吾何以知交養之然哉以此有以見人之生於世出處相濟必有時而行非匏瓜不可以長繫人之善其身枉直相循必有時而屈故尺蠖不可以長伸嗟夫今之人知動之可以成功不知非其時動亦為凶知靜之可以立德不知非其理靜亦為賊大矣哉動靜之際聖人其難之先之則過時後之則不及時交養之閒不容豪釐故老氏觀妙顏子知幾噫非二君子吾誰與歸

懷忠賦并序

歐陽詹

丙寅歲因受譴季冬之月次于殷墟歷關龍逢墓焉昔聆其風未嘗不迴腸貫涕覩夫瑩壘心又增傷遂寫憤于言為賦以弔先生以忠諫致命故以懷忠命篇云天生彼辛兮用殲覆于夏家欲悠悠而罔極毒浩浩而無涯無辜殞身肆市朝之若莽有道併命委炮烙以如麻伊先生之謬謬為

酷烈之所加嘗披圖於往載每廢卷以興嗟蕭條舊邑莽蒼空陂
陷陵成坎古木無枝或人曰此其墓也又一倍以增悲嗚呼麟非
騰噬之儔詎虎狼之共穴鳳實仁靈之類豈鷹鷂之同列惟玉石
之明分亦薰蕕之自別是以謇謇心競昂昂面折彼炎炎之原燎
信樸樸而不滅寧歸死以申懷不貪生而結舌痛矣哉古人有言
輔仁者天福善者神胡爲是日功不如人使典章之不信俾忠義
之空勤律中大呂日臨蒙谷風颼颼於衰草煙茫茫乎平陸思悽
悽而填臆淚淫淫以盈目義則非其知友親故遠夫骨肉節臨危
而不撓行於艱而彌篤惟其有之是以傷之而慟哭

泛渭賦并序

白居易

右丞相高公之掌貢舉也予以鄉貢進士舉及第左丞相鄭公之
領選部也予以書判拔萃登科十九年天子竝命二公對掌鈞軸
朝野無事人物甚安明年春予爲校書郎始徙家秦中卜居渭上
上樂時和歲稔萬物得其宜下樂名遂官閒一身得其所旣美二

公佐清靜之理又荷二公垂特達之遇發於嗟歎流於詠歌予時
泛舟于渭因爲泛渭賦以導其意辭曰

亭亭華山下有人跂兮望兮愛彼三峰之白雲泛泛渭水上有舟
沿兮沂兮愛此百里之清流以我爲太平之人兮得於斯而優游
又感陽春之氣熙熙兮樂天和而不憂曰予生之幸兮時哉時哉
當皇唐受命之九葉兮夷與華而無氛埃及皇帝繼位之二紀兮
命高與鄭爲鹽梅二賢兮爰立四門兮大開凡讀儒書與履儒行
者率充賦而西來雖片藝而必收兮故不棄予之小才感再遇於
知己心慚忤以徘徊登予名於太常署予職於蘭臺臺有蘭兮閣
有芸芳菲菲兮可襲備一官而無事又不維而不繫家去省兮百
里每三旬而兩入川有渭兮山有華澹悠悠其可賞目白雲兮漱
清流且或偃而或仰門去渭兮百步常一日而三往夜兮扣舷
天無雲兮水無煙遲遲兮明月波澹灩兮棹黃緣日暮兮舟泊草
萋萋兮沙漠漠習習兮春風岸柳動兮渚花落發浩歌以長引舉

濁醪而緩酌春冉冉兮其將盡予何爲乎不樂鳥樂兮雲際鳴嚶
嚶兮飛裔裔魚樂兮泉底鬢撥撥兮尾澈澈我樂兮聖代心融融
兮神泄泄伊萬物各得其樂者由聖賢之相契賢致聖於無爲聖
致賢於既濟凝爲和兮聚五福發爲春兮銷六沴不我後兮不我
先適當我兮生之世彼鱗蟲與羽族咸知樂而不知惠我爲人兮
最靈所以愧賢相而荷聖帝樂乎樂乎泛于渭兮詠而歸聊逍遙
以卒歲

望賦

劉禹錫

邈不語兮臨風境自外兮感從中明晦轉續兮八極鴻蒙上下交
氣兮羣生異容發孤照于寸眸驚遐情乎太空物乘化兮多象人
遇時兮不同嗟乎有目者必騁望以盡意當望者必緣情而感時
有待者瞿瞿忘懷者熙熙慮深者矐然若喪樂極者冲然無違外
徙倚其如一中糾紛兮若斯望如何其望最樂晞慶霄兮遡阿閣
如雲兮天顏咫尺如草兮臣心踴躍扇交翟兮歲旌旗升龍兮蠖

略日轉黃道天開碧落凝瑞景於庭樹掬非煙於殿幕望如何其
望且懽登灞岸兮見長安紛擾擾兮紅塵合鬱蔥蔥兮佳氣盤池
象漢兮昭回城依斗兮闌干避御史之驄馬逐倖臣之金丸望如
何其望攸好宗萬靈兮越四隩漢帝仙臺兮秦皇海嶠霓裳踊于
河上馬跡窮乎越微紫氣度關而斐疊神光屬天而照耀睨眷眷
以馳精聳專專而觀妙望如何其望有形視蠢蠢兮窮冥冥楚塞
氛惡兮蕭關燧明暈籠孤月角奮長庚沙多似雪積有疑城煙雲
非女子之氣草木盡王者之兵審曳柴之虛警破來騎之先聲信
有得于風鳥示無言于旆旌望如何其望且慕恩意隔兮年光驚
雕輦已辭兮金屋何處長信草生兮長門日暮侯翠華之儻來仰
玄天以自訴况復湘水無還漳河空注淚染枝葉香餘紉素風蕭
蕭兮北渚波煙漠漠兮西陵樹夫不歸兮江上石子可見兮秦原
墓拍琴翻朔塞之音挾瑟指邯鄲之路望如何其望最傷俟環玦
兮思帝鄉龍門不見兮雲霧蒼蒼喬木何許兮山高水長春之氣

兮悅萬族獨含嘯兮千里目秋之景兮懸清光偏結憤兮九回腸
羨環拱于白榆惜馳暉于落棠諒衝斗兮誰見伊戴盆兮何望平聲
豈止蘇武在胡管寧浮海送飛鴻之滅沒附陰火之光彩鶴頸長
引烏頭未改恨已極兮平原空起何時兮東山在永望如何傷懷
孔多降將有依風之感宮人成憶月之歌歌曰張衡側身愁思久
王粲登樓日迴首不作渭濱垂釣臣羞為洛陽拜塵友

惜餘春賦

李白

天之何為合北斗而知春兮迴指於東方水蕩漾兮碧色蘭葳蕤
兮紅芳試登高而望遠極雲海之微茫魂一去兮欲斷淚流頰兮
成行吟青楓而詠滄浪懷洞庭兮悲瀟湘何予心之縹緲兮與春
風而飄揚飄揚兮思無限念佳期兮莫展平原萋兮綺色愛芳草
兮如翦惜餘春之將闌每為恨兮不淺漢之曲兮江之潭把瑤草
兮思何堪想游女於峴北愁帝子於湘南恨無極兮心氤氳目眇
眇兮憂紛紛披衛情於淇水結楚夢於陽雲春每歸兮花開花已

關兮春改歎長河之流春送馳波於東海春不留兮時已失老衰
颯兮情逾疾恨不得挂長繩於青天繫此西飛之白日若有人兮
情相親去南國兮往西秦見游絲之橫路網春輝以畱人沈吟兮
哀歌躑躅兮傷別送行子之將遠看征鴻之稍滅醉愁心於垂楊
隨柔條以糾結望夫君兮咨嗟橫涕淚兮怨春華遙寄影於明月
送夫君於天涯

江上愁心賦

張說

江上之峻山兮鬱崎嶇音儀而不極雲為峰兮煙為色歛變態兮心
不識江上之深林兮杳冥蒙而不已鳥為花兮猿為子紛盪漾兮
言莫擬夏雲陰兮若山秋水平兮若天冬沙飛兮淅淅春草靡兮
芊芊感四節之默運知萬化之潛遷伴眾鳥兮寒渚望孤帆兮日
邊雖欲貫愁腸於巧筆紡離夢於哀弦是心也非模放之所逮將
有言兮是然將無言兮是然

別知賦

韓愈

子取友於天下將歲行之兩周下何深之不即上何高之不求紛
擾擾其既多咸喜能而好修寧安顯而獨裕顧阨窮而共愁惟知
心之難得斯百一而為收歲癸未而遷逐侶蟲地於海陬遇夫人
之來使闕公館而羅羞索微言於亂志發孤笑於羣憂物何深而
不鏡理何隱而不抽始參差以異序卒爛漫而同流何此懼之不
可恃遂駕馬而迴輶山礲礲其相軋樹蔞蔞其相摻雨浪浪其不
止雲浩浩其常浮知來者之不可以數哀去此而無由倚郭郭而
掩涕空盡日以遲留

愛而不見賦

丙辰歲待詔京邑貽舊
知作○據文苑英華補

蕭穎士

嗟乎或愛之而不見者有矣何必周秦異代夷夏殊軌阻巖城之
九重限方舟之一水苟時事之多怨故人遐而室邇關山起於足
下堂上遠乎千里聳專專之目成遽時逝而復止詩人所以思婉
變而搔首賦城隅之有俟吁不得其已也惟夙昔之良會夢佳期
於北方款渤海之三山吸流霞之景光含芳辭以貺予云惠好之

不忘顧服義於永日陪游嬉於帝鄉廣莫忽其飄怒鯨波洶而騰
張俄驚魂以輟寐間窮髮之茫茫將揭厲以復從馭風濤之匪量
顧投軀以靡吝撫遺體以兢惶晨切切以悽愴夕屏營以彷徨追
前懼之俯邇歎此恨之悠長於是收神返慮澄澹靜默冥然就寢
兀若無識冀良宵之復遇希舊游之可即徒有願兮且未克憂沈
深兮萃胸臆風兮雨兮思君子兮何極

傷往賦并序

劉禹錫

人之所以取貴於蜚走者情也而誕者以遣情為智豈至言耶子
受室九年而鰥痛若人之天闕弗遂也作賦以傷之冀夫覽者有
以增伉儷之重云
歎獨處之邑邑兮憤伊人之我遺情可殺而猶毒境當懼而復悲
人或朝歎而暮息夫何越月而逾時太極運乎三辰轉寒暑而下
馳有歸于無兮盛復于衰猶昧爽之必暮又安得而怨咨我今怨
夫若人兮曾旭旦而潛暉飄零日及之萼倏忽蜉蝣之衣川走下

而不還露迎陽而易晞恩已甚兮難絕見無期兮永思我行其野
農民桑者舉案來饁亦在林下我觀于途稗販之夫同荷均挈荆
釵布襦羽毛之蕃鱗介之微和鳴灌叢雙泳漣漪薨薨者蟲蠢蠢
伊豸游空穴深兩兩相比何同一作動類之萬殊必雄雌而與俱物
莫失儷以孤處我方踽踽而焉如我復虛室目淒涼兮心伊鬱心
伊鬱兮將語誰坐匡牀兮撫嬰兒何所勾沐兮何從仰飭襦袴在
身兮昔圍差跌鞮囊附臂兮餘馥蕙蕙誠天性之潛感顧童心兮
如疑曉然有難繼之慕漠然滅好弄之姿指遺桂兮能認翹空帷
兮欲歸我入寢宮痛人亡兮物改其容寶瑟僵兮茲柱絕瑤臺傾
兮鏡奩空寒爐委灰虛幌多風隙駟晨轉牕蟾夜通步搖昏兮網
黏翡翠芳褥掩兮塵化蛭蛭閱刀尺之餘澤見巾箱之故封翫服
儼兮猶具繁華謝兮馬從想翩翻於是非求僖宰與冥蒙信奇術
之可致嗟此生兮不逢徒注視以寂聽恍神疲而目窮還抱影以
獨出紛百哀而攻中系曰龍門風霜苦別鶴哀鳴夜銜羽吳江波

浪深雌劍一去無遺音悲之來兮憤予心洵如行波洊浸淫悵緣
情而莫極思執禮以自箴已焉哉苒苒生死悠悠古今乘彼一氣
兮聚散相尋或鼓而興或罷而沈以無涯之情愛悼不駐之光陰
諒自迷其有分徒終怨於匪忱彼蒙莊兮何人予獨累歎而長吟

夢渴賦

何諷

不宿食以晨飲困鍾孟以沈寢永春晝而高扃墮幅巾而橫枕及
乎酒適衷腸神游異方煙生喉舌恹然如狂爰瞰瑩以窺汲諒不
任於呼吸俄據河而俯瀆乃器舟而杯斛倒魚鼈之窟宅見蛟龍
之委伏猶胃腸之不浹資宴飲而未足由是奔九江走五湖手不
暇於幹運心不息於躊躇見波漸竭而百川如綫岸益高而底淤
將枯腹慊爾而未覺肺燥然而不濡尋至大溟茫然漣清豈爾浩
瀚而吾量不盈斟酌未幾倏見涯涘百靈稽首乞雷濡漑吾腹未
充豈汝為意俄傾竭於浩渺奄滴漑而無漬瑤宮貝闕盡列平地
三山赤城可以步至鯤鯨噉喙相煦以咽大鵬驚攫巨鼈愕眙四

顧燥涸悒然興情此情何奇非吾所知恨滄海之可罄不足充吾之所思周遭有截塊然墮水府萬族咸呼帝闕帝且不聞吾欲未竭方將尋蟻垤期耿恭問姜母以何在訪舒姑而欲從辨夸父於渭上弔相如於臨邛萬計已盡六腑如燼牕日斜照飛蚊遶鬢既驚既覺可歎可笑飲不盡器枯腸已療揩頤沈吟其意逾深以吾此日之一夢見自古不足者之心

文粹卷第九

文粹卷第十

吳興 姚鉉 纂

詩一 總一百四十五首

古今樂章 一百三十五首

琴操 一十首

古樂章

補樂歌十篇 元結

補九夏歌系文九篇 皮日休

今樂章

冬至日祀昊天圜丘樂章八首 魏徵褚亮虞世南等作

開元樂章十九首 張說

玄宗開元十三年封泰山祀天樂章十三首

正月上辛祈穀於南郊樂章三首 褚亮

季秋享上帝於明堂樂章一首

祀五方上帝於五郊樂章二十首

魏徵褚亮虞世南等作

祀朝日樂章三首

貞觀中作

祀夕月樂章三首

貞觀中作

睿宗太極元年登黃地祇於方丘樂章十一首

盧從愿等作

玄宗開元十三年禪社首山祭地祇樂章八首

賀知章

祭太社樂章三首

魏徵褚亮虞世南等作

享龍池樂章十首

姚崇等作

享太廟樂章五首

郭子儀等作

儀坤廟樂章九首

徐彥伯等作

琴操十首

韓愈

補樂歌十篇

并序

元結

自伏羲氏至於殷室凡十代樂歌有其名亡其辭考之傳記其義或存焉嗚呼樂聲自太古始百世之後盡亡古音嗚呼樂歌自太古始百世之後遂亡古辭今國家追復純古列祀往帝歲時薦享

則必作樂而無雲門咸池韶夏之聲故探其名義以補之誠不足全化金石反正宮羽而或存之猶一冥冥有純古之聲豈幾乎司樂君子導和焉爾凡十篇二十章各引其義以序之命曰補樂歌

網罟伏羲氏之樂歌也其義蓋稱伏羲能易人取禽獸之勞吾人苦兮水深深網罟設兮水不深吾人苦兮山幽幽網罟設兮山不幽

右網罟二章章四句

豐年神農之樂歌也其義蓋稱神農教人種植之功

猗太帝兮其智如神分草實兮濟我生人猗太帝兮其功如天均

四時兮成我豐年

右豐年二章章四句

雲門軒轅氏之樂歌也其義蓋言雲之出潤益萬物如帝之德無所不施

文粹十
玄雲溶溶兮垂雨濛濛類我聖澤兮涵濡不窮黃雲漠漠兮含映
逾光邈我聖德兮麻一作薄被無方

右雲門二章章四句

九淵少昊氏之樂歌也其義蓋稱少昊之德淵然深遠

聖德至深兮齋齋如淵生類娛娛許其兮孰知其然

右九淵一章章四句

五莖顓頊氏之樂歌也其義蓋稱顓頊得五德之根莖

植植萬物兮修修根莖五德涵柔兮颯颯房或而生其如何兮袖似周

袖反天下皆自我君兮化成

右五莖一章章七句

六英高辛氏之樂歌也其義蓋稱帝嚳能總六合之英華

我有金石兮擊考崇崇與汝歌舞兮上帝之風由六合兮英華颯

颯我有絲竹兮韻和泠泠與汝歌舞兮上帝之聲由六合兮根柢

羸羸

右六英二章章六句

咸池陶唐氏之樂歌也其義蓋稱堯德至大無不備全

元化油油兮孰知其然至德汨汨姑沒兮順之以先元化滉滉音

兮孰知其然至道泱泱兮由之以全

右咸池二章章四句

大韶有虞氏之樂歌也其義蓋稱帝舜能紹先聖之德

森森羣象兮日見生成欲聞朕初兮玄封冥冥洋洋至化兮日見

深柔欲聞大濩兮大淵油油

右大韶二章章四句

大夏有夏氏之樂歌也其義蓋稱禹治水其功能大中國

茫茫下土兮乃生九州山有長岑兮川有深流茫茫下土兮乃均

四方國有民人兮野有封疆茫茫下土兮乃歌萬年上有茂功兮

下戴仁天

右大夏三章章四句

大濩有殷氏之樂歌也其義蓋稱湯救天下濩然得所
萬姓苦兮怨且哭不有聖人兮誰濩育聖人生兮天下和萬物熙
熙兮舞且歌

右大濩二章章四句

補九夏歌系文九篇

并序

皮日休

周禮鍾師掌金奏凡樂事以鍾鼓奏九夏按鄭康成注云夏者大
也樂之大者歌有九也九夏者皆詩篇銘頌之類也此歌之大者
載在乎樂章樂崩亦從而亡是以頌不能具也嗚呼吾觀之魯頌
其古也亦以久矣九夏亡者吾能頌乎夫大樂既去至音不嗣頌
於古不足以補亡頌於今不足以入用庸何頌乎頌之亡者俾千
古之下鄭衛之內窈窕冥冥不獨有大卷音拳黃之音者乎

王夏之歌者王出入之所奏也

燻燻皎日歛麗于天厥明御舒如王出焉燻燻皎日歛入于地厥
晦惟貞如王入焉出有龍旂入有珩佩勿驅勿馳惟慎惟戒出有

嘉謀入有內則繁彼臣庶欽王之式

王夏四章章四句

肆夏之歌者尸出入之所奏也

愔愔清廟儀儀袞服我尸出矣迎神之穀杳杳陰竹坎坎路鼓我
尸入矣得神之祐

肆夏二章章四句

昭夏之歌者牲出入之所奏也

有鬱其鬯有儼其彝九變未作全乘來之既醑既酢爰音允爰
舞象物既降全乘之去

昭夏二章章四句

納夏之歌者四方賓客來之所奏也

麟之儀儀不繫不維樂德而至如賓之嬉鳳之愉愉不箐不斂樂
德而至如賓之娛自筐及管我有牢醕自筐及筐我有貨幣我牢
不愆我貨不匱碩碩其才有樂而止

納夏四章章四句

章夏之歌者臣有功之所奏也

王有虎臣錫之鈇鉞征彼不德一撲而滅王有虎臣錫之圭瓚征

彼不享一烘而泮王有掌封道音偵爾疆理王有掌客饋爾饗餼何

以樂之金石九奏何以賜之龍旂九旒去聲

章夏四章章四句

齊夏之歌者夫人祭之所奏也

瓊瓊衡筓翬翬翟自內而祭為君之則

齊夏一章章四句

族夏之歌者族人酌之所奏也

洪源誰孕疏為江河大塊孰埏播為山阿厥流浩漾厥勢嵯峨今

君之酌慰我實多

族夏二章章四句

祓夏之歌者賓既出之所奏也

禮酒既酌嘉賓既厚牘為之奏禮酒既竭嘉賓既悅應為之節禮

酒既罄嘉賓既醒雅為之行牘應雅三樂器也賓醉而出奏祓夏以此三器築地為之行事也

祓夏三章章三句

驚夏之歌者公出入之所奏也

桓桓其珪袞袞其衣出作二伯天子是毗桓桓其珪袞袞其服入

作三孤國人是福

驚夏二章章四句

冬至日祀昊天圓丘樂章八首魏徵褚亮虞世南等作

降神用豫和

上靈睠命膺會昌盛德殷薦叶辰良景福降兮聖德遠玄化穆兮

天麻長

皇帝行用太和

穆穆我后道應千齡登三處大得一居貞禮惟崇德樂以和聲百

神仰止天下文明

文萃

五

登歌奠玉帛用肅和

闔陽播氣甄曜垂明有赫圓宰深仁曲成日麗蒼璧煙開紫營聿
遵虔享式降鴻禎

迎俎用雍和

欽惟大帝載仰皇穹始命田燭爰啟郊宮雲門駭聽雷鼓鳴空神
其介祀景祚斯融

酌獻飲福用壽和

八音斯奏三獻畢陳寶祚惟永暉光日新

送文舞出迎武舞入用舒和

疊壁凝影皇壇路編珠流彩帝郊前已奏皇鍾歌大呂還符寶歷
祚昌年

武舞作用凱安

昔在炎運終中華亂無象鄴郊赤烏見邙山黑雲上大賚下周車
禁暴開殷網幽明同叶贊鼎祚齊天壤

送神用豫和

歌奏畢兮禮獻終六龍馭兮神將昇明德感兮非黍稷降福簡兮
祚休徵

開元樂章十九首

張說

迎神永和之樂三章

動神心 禮宿設

肅九室

諧八音

歌皇慕

裸奠臨

樂妙尋

聲明格

依玉几

御黼筵

聆愾息

律迓氣

音入立

百福傳

聽和平

相百辟

俊周旋

九韶徧

來祖考

帝孝成

神休妥

信工祝

永頌聲

皇帝行太和之樂一章

清廟肅雍

致誠勤孝

時文聖后

繩繩雲步

穆穆天容

在貌思恭

玉節肆夏

金鏘五鍾

天子孝享
聲以求陽

酌瓚登歌肅和之樂一章
工歌溥將 躬裸鬱鬯 奉時蒸嘗 永代不忘

乃蒸嘗薌 臭以達陰

在滌嘉豢

迎俎雍和之樂二章
麗碑敬牲 角握之牡

色純之駢 火傳陽燧

水漑陰精

太公胖俎 傳說和羹

既戒既平 鼓鍾管磬

齋戒豐潔

俎豆有馨 亦有和羹

酌獻用文舞一章

聖謨九德

眞言五千 慶集昌胄

符開帝先 高文仗鉞

克配彼天

三宗握鏡 六合渙然

帝其承祀 率禮罔愆

圖書霧出

日月清懸 舞形德類

五行氣順 八佾風宣 介此百福 於皇萬年

綵雲踟躕

宣皇帝室光大之舞一章

肅肅藝祖

滔滔濬源

有雄玉劔

作鎮金門

文王餘緒

后稷謀孫

肇禋九廟

四海來尊

具禮崇德

光皇帝室長發之舞一章

備樂承風 魏推幢主

周贈司空

不行而至

無成有終

神與王業

天歸帝功

於赫元命

景皇帝室大政之舞一章

權輿帝文 天齊八柱

地半三分

宗廟觀德

笙鏞樂動

封唐之兆 成天下君

帝舞季歷

襲聖生昌 后歌有媯

胎炎孕黃

天地合德

日月齊光

肅雍孝享 祚我萬方

赤精亂德

高祖神堯皇帝室大明之舞一章

四海困窮 黃旗舉義

三靈會同

早望春雨

雲披大風

溥天來祭 高祖之功

文萃

文萃

文萃

文萃

文萃

太宗文武聖皇帝室崇德之舞一章

皇合一德 朝宗百神 削平天下 大拯生人 上帝配食

單于入臣 戎歌陣舞 睚眦震震 叶平

高皇邁道 端拱無為 化懷獯鬻 兵戢句驪 禮尊封禪

樂盛來儀 合位媧后 同稱伏羲

中宗孝和皇帝室文和之舞一章

退居江水 鬱起丹陵 禮物還舊 朝章中興 龍圖友及

駿命恭膺 鳴球香瓊 大禧是承

睿宗大聖真皇帝室景雲之舞一章

景雲霏爛 告我帝符 噫帝沖德 與天為徒 笙鏞遙遠

俎豆虛無 春秋孝獻 迴復此都

皇帝受福酒酢福和之樂一章 敬徹愛存 獻懷稱壽

備禮用樂 崇親致尊 誠通慈降

啐感承恩 皇帝孝德 子孫千億 大包天域 長亘不極

送文舞迎武舞一章 樂府作舒和

六鍾翕協六變成 八佾倘佯八風生 樂九韶兮人神感

美七德兮天地清 亞終獻武舞凱安之樂四章

瑟彼瑤爵 亞維上公 室如屏氣 門不容躬 禮殷其本

樂執其中 聖皇所慕 天地幽通

禮幣三獻 樂變九成 降循軒陛 仰歆皇情 福與仁合

德因孝明 百年神畏 四海風行 坐作為容 離若鷺鳥

總總干戚 填填鼓鍾 奮揚增氣 坐作為容 離若鷺鳥

合如戰龍 萬方觀德 肅肅雍雍

烈祖順三靈 文宗威四海 黃鉞誅羣盜 朱旗掃多罪

戢兵天下安 約法人心改 大哉干羽意 長見風雲在

撤豆登歌一章

止笙磬
神在天

撤豆籩
情餘慕

廊無響
禮罔愆

宵入玄
嘉黍稷

主在室
屢豐年

眇嘉樂
迴風上

送神一章
援靈爽

感若來
還惚恍

思如往
懷靈駕

休氣息
結空想

立宗開元十三年封泰山祀天樂章一十三首
降神用豫和六變

款秦壇
薦樂聲

夾鍾宮之一
柴泰清

受天命
歆下迎

報天成
竦皇心

億上帝
大禧馨

夾鍾宮之二
臨下庭

騎日月
澹神心

陪列星
醉皇靈

嘉視信
夾鍾宮之三

相百辟
鏗皇皇

貢八荒
帝欣欣

九歌敘
福穰穰

萬舞翔
肅振振

高在上
牧蒼生

黃鍾宮之四
道光明

物資始
太階平

德難名
承眷命

天道無親
聰明會真

太簇徵之五
至誠與鄰

山川徧禮
通乎百神

宮徵惟新
玉帛非盛

饗帝饗親
笙鏞禮盛

姑洗羽之六
維孝維聖

緝熙懿德
敷揚成命

華夷志同
明靈降止

感此誠敬
迎送皇帝用太和

孝敬中發
玄靈垂光

禮樂具舉
禮樂具舉

騰華照寓
濟濟洋洋

如昇太陽
貞璧就奠

登歌奠玉帛用肅和羽調

奠祖配天 承天享帝 百靈咸秩 四海來祭 植我蒼璧

布我玄製 華日徘徊 神煙容裊

迎俎入用雍和

俎豆有祕 絜粢豐盛 亦有和羹 既戒既平 鼓鍾管磬

肅唱和鳴 皇皇后祖 來我思成

酌獻用壽和

烝烝我后 享獻惟寅 躬酌鬱鬯 跪奠明神 孝莫孝乎配

上帝於親 敬莫敬乎教天下為臣

皇祖嚴配 配享皇天 皇皇降嘏 天子萬年

送文舞出迎武舞入用舒和商調

六鍾翕協六變成 八佾徜徉八風生 樂九韶兮人神感

美七德兮天地清

送神用豫和夾鍾宮調

禮樂終 煙燎上 懷靈惠 結皇想 歸風疾

迴天爽

百福來

眾神往

正月上辛祈穀於南郊樂章三首 褚亮

登歌奠玉帛用肅和

履艮斯繩 居中體正 龍運垂祉 昭符啟聖 式事嚴禋

聿懷嘉慶 惟帝永錫 時皇休命

迎俎用雍和

殷薦乘春 太壇臨曙 八簋盈和 六瑚登御 嘉稷匪歆

德馨斯飶 祝嘏無易 靈心有豫

送文舞出迎武舞入用舒和

玉帛犧牲申敬享 金絲戚羽盛音容 庶俾億齡禔景福

長欣萬寓洽時邕

季秋享上帝於明堂樂章一首

送文舞出迎武舞入用舒和

御展合宮承寶麻 席圖重館奉明靈 偃武修文九圍泰

沈烽靜析八荒寧

祀五方上帝於五郊樂章二十首
魏徵褚亮虞世南等作

祀黃帝降神用宮音

黃中正位 含章居貞 既長六律 兼和五聲 畢陳萬舞

乃薦斯牲 神其下降 永祚休平

登歌奠玉帛用肅和

眇眇方輿 蒼蒼圓蓋 至哉樞紐 宅中圖大 氣調四序

風和萬籟 祚我明德 時雍道泰

迎俎用雍和

金縣夕肆 玉俎朝陳 饗薦黃道 芬流紫辰 迺誠迺敬

載享載禮 崇祀斯在 惟皇是寶

送文舞出迎武舞入用舒和

御徵乘宮出郊甸 安歌率舞遞將迎 自有雲門符帝賞

猶持雷鼓答天成

祀青帝降神用角音

鶴雲旦起 鳥星昏集 候啟新風 陽開初蟄 至德可饗

行潦斯挹 錫以無疆 蒸人乃粒

登歌奠玉帛用肅和

玄鳥司春 蒼龍登歲 節物變柳 光風轉蕙 瑤席降神

朱弦享帝 誠備祝嘏 禮殫珪幣

迎俎用雍和

大樂希音 至誠簡禮 文物棣棣 聲明濟濟 六變有成

三登無體 迺眷豐絜 恩覃愷悌

送文舞出迎武舞入用舒和

笙歌籥舞屬年韶 鷺鼓鳧鍾展時豫 調露初迎綺春節

承雲遽踐蒼霄馭

祀赤帝降神用徵音

青陽告謝

朱明戒序

咸長是祈

敬陳椒醕

博碩斯薦

笙鏞備舉

庶盡肅恭

非馨稷黍

登歌奠玉帛用肅和

離位克明

火中宵見

峰雲暮起

景風晨扇

木槿初榮

含桃可薦

芬馥百品

鏘洋三變

迎俎用雍和

昭昭丹陸

奔奔炎方

禮陳牲幣

樂備簾簣

瓊羞溢俎

玉齊浮觴

恭惟正直

歆此馨香

送文舞出迎武舞入用舒和

千里溫風飄絳羽

十枚炎景騰朱干

陳觴薦俎歌三獻

拊石撻金會七盤

祀白帝降神用商音

白藏應節

天高氣清

歲功既阜

庶類收成

萬方靜謐

九土和平

馨香是薦

受胙聰明

登歌奠玉帛用肅和

金行在節

素靈居正

氣肅霜嚴

林彫草勁

豺祭隼擊

潦收川鏡

九穀已登

萬箱流詠

迎俎用雍和

律應西成

氣躔南呂

珪幣咸列

笙竽備舉

苾苾蘭羞

芬芬桂醕

式資宴貺

用調霜序

送文舞出迎武舞入用舒和

璿儀氣爽驚緹籥

玉呂灰飛含素商

鳴鞀奏管芳羞薦

會舞安歌葆旒揚

祀黑帝降神用羽音

嚴冬季月

星迴風厲

享祀報功

方祈來歲

登歌奠玉帛用舒和

律周玉琯

星回金度

次極陽烏

紀窮陰兔

火林霰雪

湯泉凝洹

八蜡已登

三農息務

迎俎用雍和

陽月斯紀

應鍾在候

載潔牲粢

爰登俎豆

既高既遠

無聲無臭

靜言格思

惟神保佑

送文舞出迎武舞入用舒和

執籥持羽初終曲

朱干玉戚始分行

七德九功咸已暢

明靈降福具穰穰

祀朝日樂章三首

貞觀中作

登歌奠玉帛用肅和

惟聖格天

惟明饗日

帝郊肆類

王宮戒吉

珪奠春舒

鍾歌曉溢

禮云克備

斯文有秩

迎神用雍和

晨儀式薦

明祀惟光

神物爰止

靈暉載陽

玄端肅事

紫幄興祥

福履攸假

於昭令王

送文舞出迎武舞入用舒和

崇牙樹羽延調露

旋宮扣律掩承雲

誕敷懿德昭神武

載集豐功表睿文

祀夕月樂章三首

貞觀中作

登歌奠玉帛用舒和

測妙為神

通微曰聖

坎祀貽則

郊禋展敬

璧薦登光

金歌動映

以載嘉德

以流曾慶

迎俎用雍和

肅晨爭舉

天宗禮闕

夜典涼秋

陰明湛夕

有齊斯旨

有牲斯碩

穆穆其暉

穰穰是積

送文舞出迎武舞入用豫和

合吹八風金奏動

分容萬舞玉鞘驚

辭昭茂典光前烈

夕曜成功表舊明

睿宗太極元年登黃地祗於方丘樂章十一首

林鍾商

大樂和暢 殷薦明神 一降通感 八變必臻 有求斯應

太簇角

無德不親 降靈醉止 休徵萬人 品彙咸亨 列俎棋布

姑洗徵

坤元載物 陽樂發生 播殖資始 後德惟明 馨香畢陳 樂和禮備

南呂羽

大君出震 有事郊禋 齋戒既肅 實賴明神 永言孝思 滌濯靜嘉

黃鍾宮

於穆濬哲 維清緝熙 肅事昭配 神之聽之 用受福釐 滌濯靜嘉

黃鍾宮

於穆聖皇 六葉重光 太原刻頌 后土疏場 寶鼎呈符

歆雲孕祥

禮樂備矣

降福穰穰 登歌奠玉帛 用肅和 祥符寶鼎 禮備黃琮 祝辭以信

介茲景福

永永無窮 登俎用雍和 潔我簪薌 有豆孔碩 為羞既臧 至誠無昧

酌獻飲福用壽和

精意惟芳 神其醉止 欣欣樂康 樂章乃陳 誰其作主 皇考聖真 對越在天

宵然汾上

厚澤如春 送文舞出迎 武舞入用舒和 昭假于天 惟馨薦矣

禮章載虔

禮宗于地 既醉歆焉 神之降福 永永萬年 武舞用凱安

黃鍾均之林鍾徵

蔣挺

文萃十

古

維歲之吉 維辰之良 聖君紱冕 肅事壇場 大禮已備

大樂斯張 神其醉止 降福無疆 送神用順和 源光裕

方丘既膳 嘉饗載謐 齋敬畢誠 陶匏貴質 秀簋豐薦

芳俎盈實 永永福流 其昇如日 玄宗開元十三年禪社首山祭地祇樂章八首

賀知章

迎神用順和

至哉合柔德 萬物資以生 恒順稱厚載 流謙通變盈

聖心事能察 增廣陳厥誠 黃祇俊如在 泰折俟咸亨

皇帝行用太和

肅我成命 於昭黃祇 裘冕而祀 陟降在斯 五音克備

八變聿施 緝熙肆靖 厥心匪離 登歌奠玉帛用肅和

黃祇是祇 我其夙夜 夤畏誠絜 匪遑寧舍 禮以琮玉

薦厥茅藉 念茲降康 胡寧克暇

夙夜宥密 不敢寧晏 五齊既陳 八音在縣 粢盛以絜

房俎斯薦 明德惟馨 尙茲克徧 皇帝初獻用壽和

惟以明發 有懷載殷 樂盈而返 禮順其禋 立清以獻

薦欲是親 於穆不已 哀對斯臻

穆穆天子 告成岱宗 大裘如濡 執珽有顒 樂以平志

禮以和容 上帝臨我 云胡肅邕

昭昭有唐 天俾萬國 列祖應命 四宗順則 申錫無疆

宗我同德 曾孫繼緒 享神配極

文萃一 左

送神用靈具醉代順和

靈具醉 杳熙熙 靈將往 眇視視 顧明德

吐正辭 爛遺光 流禎祺

祭太社樂章三首魏徵褚亮虞世南等作

登歌奠玉帛用肅和 后土凝德 神功叶契 九域底平 兩儀交際 戊期應序

陰墉展幣 靈車少留 俯歆樽桂

迎俎用雍和 美報崇本 嚴恭展事 受露流壇 承風啟地 絜粢登俎

醕犧入饋 介福遠流 羣生畢遂

送文舞出迎武舞入用舒和

神道發生敷九稼 陰陽乘仁暢八埏 緯武經文陶景化

登祥薦祉啟豐年

享龍池樂章十首

第一章

姚崇

恭聞帝里生靈沼應報明君鼎業新既叶翠泉光寶命還符白水
出真人當時舜海潛龍躍此日堯河帶馬巡獨有前池一小鴈叨
承舊惠入天津

第二章

帝宅王家大道邊神馬潛龍涌聖泉昔日昔時經此地春來春去
漸成川歌臺舞榭宜正月柳岸梅洲勝往年莫疑波上春雲少祇
為龍飛直上天

第三章

沈佺期

龍池躍龍龍已飛龍德光天天不違池開天漢分皇道龍向天門
入紫微邸第樓臺多氣色君王鳧鴈有光輝為報寰中百川水來
朝上地莫東歸

第四章

代邸東南龍或躍泉清碧浪遠浮天樓臺影就波中出日月光疑

鏡裏懸鴈沼迴流成舜海龜書薦祉應堯年大川既濟慙爲楫報
德空思奉細涓

第五章

姜皎

龍池初此出龍山常經此地謁龍顏日日芙蓉生夏水年年楊柳
變春灣堯壇寶匣餘煙霧舜海漁舟尙往還願以飄颻五雲影從
來從去九天間

第六章

龍興白水漢興符聖主時乘運斗樞岸上丰茸五花樹波中的皦
千金珠操環昔聞迎夏啟發匣先來瑞有虞風色雲光隨隱見赤
雲神化象江湖

第七章

蘇頌

西京鳳邸躍龍泉佳氣休光鎮在天軒后霧圖今已得秦王水劍
昔常傳恩魚不似昆明釣瑞鶴長如太液仙願侍巡遊同舊里更
聞簫鼓濟樓船

第八章

李乂

星分邑里四人居水洊源流萬頃餘魏國君王稱象處晉家藩邸
化龍初青蒲似騁遊梁馬綠藻疑游宴鎬魚自有神靈滋液地年
年雲物史官書

第九章

姜晞

靈沼縈迴邸第前浴日涵春寫曙天始見龍臺昇鳳闕應如霄漢
起神泉石匱渚傍還啟聖桃李初生更有仙欲化帝圖從此受正
同河變一千年

第十章

乾坤啟聖吐龍泉水年年勝一年始看魚躍方成海卽觀龍飛
利在天洲渚遙將銀漢接樓臺直與紫微連休氣榮光常不散懸
知此地是神仙

享太廟樂章五首

玄宗至道大聖大明孝皇帝室奠獻用廣運之舞一

章

於赫皇祖昭明有融惟文之德惟武之功河海靜謐車書混同虔
恭孝饗穆穆玄風

肅宗文明武德大聖大宣孝皇帝室奠獻用惟新之
舞一章

漢祚惟永神功中興風驅氛祲天覆黎蒸三光再朗庶績其凝重
熙累葉景命是膺

代宗睿文孝武皇帝室奠獻用保大之舞一章

於穆文考聖神昭彰簫勺羣慝含光遠方萬物茂遂九夷賓王悃
悃雲韶德音不忘

德宗神武孝文皇帝室奠獻用文明之舞一章

於穆時文受天明命允恭玄默化成理定出震嗣德應乾傳聖猗

歟緝熙千億流慶

憲宗聖神章武孝皇帝室奠獻用象之舞一章

肅肅清廟登顯至德澤周八荒兵定四極生物咸遂羣盜滅息明
聖繼承子孫千億

儀坤廟樂章九首

迎神用永和

林鍾宮 徐彥伯

猗若清廟肅肅熒熒國薦嚴祀坤興淑靈有几在室有樂在庭臨
茲孝享百祿惟寧

皇帝行用太和

黃鍾宮 邱悅

孝哉我后冲乎迺聖道映重華德輝文命慕深視篋情殷撫鏡萬
國移風兆人承慶

酌獻登歌用肅和

中呂均之太蕪 張齊賢

裸圭既濯鬱鬯既陳畫幕雲舉黃流玉醕儀充獻酌禮盛眾禋地

文萃一

大

文萃一

大

郭子儀

希安

文粹十
察惟孝愉焉饗親

迎俎用雍和 林鍾宮

薛稷

陽靈配德陰魄昭升堯壇鳳下漢室龍興倪天作對前旒是凝化
行南國道盛西陵造舟集灌無德而稱我粢既潔我醴既澄陰陽
靈廟光靈若憑德馨惟饗孝思蒸蒸

昭成皇后室酌用坤貞

乾道既亨坤元以貞肅雍攸在輔佐斯成外睦九族內光一庭克
生睿哲祚我休明欽若徽範悠哉淑淑靈建茲清宮于彼上京縮茅
以獻絜秬惟馨實受其福期乎億齡

飲福酒用壽和 黃鍾宮

徐堅

於穆清廟肅雍嚴祀合福受釐介以繁祉

送文舞出迎武舞入用舒和

胡雄

肅無虧
送文迎武遞參差一始一終光聖儀四海生人歌有慶千齡孝享

撤俎用雍和 蕤賓均之夾鍾

員半千

孝享云畢維撤有章雲感玄羽風悽素商瞻望神座祇戀匪違禮
終樂闋肅雍鏘鏘

送神 林鍾商

祝欽明

闕宮實實清廟微微降格無象馨香有依式昭饗慶方融嗣徽明
禋是享神保聿歸

琴操十首

韓愈

將歸操 孔子之趙聞殺鳴犢作

狄之水兮其色幽幽我將濟兮不得其由涉其淺兮石齧我足乘
其深兮龍入我舟我濟而悔兮將安歸尤歸乎歸乎無與石鬪兮
無應龍求

猗蘭操 孔子傷不逢時作

蘭之猗猗揚揚其香不採而佩於蘭何傷今天之旋其曷為然我
行四方以日以年雪霜貿貿薺麥之茂子如不傷我不爾覲薺麥

之茂薺麥之有君子之傷君子之守

龜山操 孔子以季桓子受齊女樂諫不從望龜山

而作

龜之氛兮不能雲舊作雨龜之枿兮不中梁柱龜之大兮祇以奄魯知將隳兮哀莫予伍周公有鬼兮嗟予歸輔

越裳操 周公作

雨之施物以孳我何意於彼為自周之先其艱其勤以有疆宇私我後人我祖在上四方在下厥臨孔威敢戲以侮孰荒于門孰治于田四海既均越裳是臣

拘幽操 文王姜里作

目窈窕兮其凝其盲耳肅肅兮聽不聞聲朝不見日出兮夜不見月與星有知無知兮為死為生嗚呼臣罪當誅兮天王聖明

岐山操 周公為太王作

我家于幽自我先公伊我承緒敢有不同今狄之人將土我疆民

為我戰誰使死傷彼岐有咀我往獨處爾莫余追無思我悲

履霜操 尹吉甫子伯奇無罪為後母譖而見逐自傷作

父兮兒寒母兮兒飢兒罪當答逐兒何為兒在中野以宿以處四無人聲誰與兒語兒寒何衣兒飢何食兒行于野履霜以足母生眾兒有母憐之獨無母憐兒寧不悲

雉朝飛操 牧犢子七十無妻見雉雙飛感之而作

雉之飛于朝日羣雌孤雄意氣橫出當東而西當啄而飛隨飛隨啄羣雌粥粥嗟我雖人曾不如彼雉雞生身七十年無一妾與妃

別鵠操 商陵穆子娶妻五年無子父母欲其改娶其妻聞之中夜悲嘯穆子感之而作

雄鵠銜枝來雌鵠啄泥歸巢成不生子大義當乖離江漢水之大鵠身鳥之微更無相逢日且可繞樹相隨飛

殘形操 曾子夢見一狸不見其首作

文粹卷第十
有獸維狸兮我夢得之其身孔明兮而頭不知吉凶何爲兮覺坐
而思巫咸上天兮識者其誰

文粹卷第十

文粹卷第十一

吳興 姚鉉 簞

詩一總六十九首

楚騷體

九諷系述 皮日休

反招魂

悼賈

效古詩

江有楓十章 蕭穎士

菊榮五章

有竹七章

蟬鳴五章 宋華

涼雨一章 蕭穎士

虞獲子鹿一章 韋應物

上古之什補亡訓傳十三章 顧況

倬彼我系九首 王勃

元和聖德詩一首 韓愈

鄆州谿堂詩一首

漢隄詩一首 盧肇

有所恨二章 歐陽詹

河之水二章 韓愈

九諷系述 并序

皮日休

昔在屈平既放作離騷經正詭俗而為九歌辨窮愁而為九章是後詞人撫而為之皆所以嗜其麗詞擅其逸藻者也至若宋玉之九辨王褒之九懷劉向之九歎王逸之九思其為清怨素豔幽快古秀皆得芝蘭之芬芳鸞鳳之毛羽也然自原已降繼而作者皆相去數百祀足知其文難述其辭罕繼者矣大凡有文人不擇難易皆出於豪端者乃大作者也揚雄之文上軻乎而有廣騷也梁

竦之辭班馬乎而有悼騷也又不知王逸奚罪其文不以二家之述為離騷之兩派也昔者聖賢不偶命必著書以見志況斯文之怨抑歎噫吾之道不為不明吾之命未為不偶而見志斯文者吾懼來世任臣之君因謗而去賢持祿之士以猜而遠德故復嗣數賢之作以九為數命之為九諷焉嗚呼百世之下復有修離騷章句者乎則吾之文未過不為乎廣騷悼騷也

粵句亶之薄俗兮其風狡而且苦吾欲以直道擣其邪心兮皆騁容而莫顧前誨行兮後止高諭仰兮下俯咸為吾之儼為愚兮並以吾之懇為偃羌靈修之乃吾知兮先職我而為輔奈其臣之信信兮乃不知吾之所撫吾欲以明詰之性辨君臣之分兮定文物之數吾欲以正訐之道兮進忠賢而退姦豎吾欲以醇醲之化兮反當今而為往古吾欲以忖度之志兮定觚圓而反規矩念僮覆之在位兮若臯羊之當路內灼怛以如傳兮復何知其所愬乃指天而鬱悠兮將天奪乎國祐永怒怒以何言兮將求知其吾祖

右正俗

有肪兮點而謂之不絜有泉兮壅而謂之不決有莛兮輶而謂之不芳有軸兮輳而謂之不轍聲喧許遠切唏以無音兮氣鬱悒而空咽既怒怒以增懼兮又謾謾漫而不訣誣彭祖以為孺兮譎殤子以為臺夥眾人之難信兮擗夸者之不悅佞為疵兮何去姦為疣兮莫劓音譴為轡兮莫御謗為玉兮何切斲既臙而必烹兮木方變子公切兮必折心龍輓而似車兮思絲絲而如咫手欲動兮似拳足將行兮如絀既不辨其顏跖兮遂一貫於堯桀吾哀生之不遲兮奚至死而憒憒念帝座之不燼他郎切兮故交光於卷舌既何路以自辨兮遂沒齒而癆刺

右遇謗

靳尚之言兮美如嬪子蘭之氣兮醲於醒既怒驟音以相向兮遂裹足而南征面懼懼以美色心慄慄以何情耳方聰兮忽睽目正視兮忽盲目當午兮便昃天方晝兮不明欲泣兮有血將啼兮失

聲望靈修兮似失出國門兮若驚軻識怨兮亦緩駟知愁兮復鳴既徜徉兮夏水復眷戀兮南荆嗟余夙秉於大訓兮涵清骨之忠貞既質質者之莫予容兮向重蒼而自盟既淋路南切仁以憑義兮遂詠信而規規誠將真宰之不仁兮胡為役余以此生彼鸞斯之蝨賊兮固不能容乎鷓鴣彼茨萊之叢穢兮固不能讓乎杜蘅已矣乎國無人兮莫我留將訴帝于玉京

右見逐

荷為凋丁牛切兮芰為襪碑荃為褊居勿切分薛為禕弭吾棹兮澧之浦駐吾楫兮湘之湄悲莫悲兮新去國怨莫怨兮新相思幽篁蕭兮靜晚清漪澹兮去遲湘君欲出兮風水急帝子不來兮煙雨微芷既老兮白葍於角切日將暮兮紅菱朝浮乎鵲蹠啼夕叫乎羈雌禮濛濛兮不止瀟黃悠悠兮何之日出沒兮北渚雲依稀兮九疑既無人以辯余兮又何心而怨咨退不解其恫悞上音錫下音季兮進不知其忸怩寒蜩怨而無聲兮古木懷其寡枝嗟吾鬼之不反兮

千秋萬歲湘中馳

右悲游

慨天道之不明兮何獨生此大佞若烏入猱之能冠兮當一國而持柄見亂臣之反詐兮信其主以不競轍已覆而又遵兮五切將翻而不整不思心腹之疾兮又玩膏肓之病竟客死於咸陽兮終不作毒王之幸既養火胡魑以為患兮遂倒音釘以授柄將諛臣以肆禍兮豈上天之付命粵吾大以為不可兮彼以災而為慶儻靈均之鬼有知兮刷吾恥於下暝

右憫邪

有美一人兮端憂千喑蔭萬愁兮曾不得以少休腸結多以莫迴兮淚啼極而不流王孫何處兮碧草極目公子不來兮清湘滿樓汀邊月色兮曉將曉浦上蘆花兮秋復秋天沈寥以似淬兮峰巖崒以如抽篔簹颯兮兩岸杜若死兮霜洲遺余程兮澧之側整余陌兮湘之幽望女嬃兮秭歸夢懷宋玉兮荆門愁欲向天以號咷

兮寸晷不可以少留又不知吾魄之所處兮永冥冥以悠悠

右端憂

山之巔兮水之涘桂為祠兮蘭為祀執玉桴兮扣雷鼓奠金盃兮滴浮蟻薦瓊芳兮望暮雲獻椒醕兮拜寒水祝胙蟹以怪談兮巫妖冶而魅醉波閃倏兮湘君竹蕭疏兮帝子日將暮兮河伯秋正深兮山鬼神之化兮何方人之艱兮至此胡不化其邪而為正兮胡不反其戾而為義胡不轉其亡而為興兮胡不易其亂而為治但血食於下國兮罪不少裨於有位吾將乘青螭而駕白虬兮謁帝而訴神之累請天弧發鏃兮天棊行筆神速悔尤兮俾吾靈修而易志

右紀祀

粵吾秉志兮絜於瑾瑜芬其德而芳其道兮榮於薜蘿將興國以見罪兮擬佐王而蒙辜彼羣小之茸茸兮如慕臭之鼈蟬以大鵬為爵兮以康瓠為觚以袞衣為襍兮以黎邱為墟以鄭姬為醜兮

以子產爲愚以鮑焦爲貪兮以孔聖爲誣吾將奮鱗於大空兮奚獨慕此江湖吾將發榮於蟠桃兮奚獨守此蒿蕞吾將蕩其魄兮驂風軻與軋車謁帝於冥冥之天兮秉其生殺之樞將飄飄以爲逝兮亦何必懷此佞邪之故都

右捨慕

堯死兮舜滅禹殄兮湯絕似玉兮將沈如金兮永沒行以仁兮止以義生以貞兮死以絜念余曾不足以蹈聖闕兮亦慕茲而自悅湘浦兮煙深沉江兮風切顧影兮自憐撫躬兮永訣鬼慘兮神悲兩泣兮泉咽竟汨沒以齋淪兮永幽憂而佛鬱湘之山兮未盡湘之流兮不竭千秋兮愁雲萬古兮明月靈均之冤兮孰能銷其氣靈均之愁兮孰能釋其結來者之自鑒兮無致位於牙孽

右絜死

反招魂并序

屈原作大招魂或曰景差作疑不能明宋玉作招魂皮子以爲忠放不如守

介而死奚招魂爲故作反招魂一篇以辨之辭曰

承溟滓之命兮付余才而輔君君既不得乎志兮余飄飄而播遷余蕩大空而就滅兮君又招余俾復身余詣帝以請訣兮帝俾巫陽以筮云巫陽語余以不可歸兮故作詞以招君乃下招曰君兮歸來故都慎不可留些其君雄虺兮其民封狐些食民之肝鬲以爲其肉兮摘民之髮膚以爲其衣些朝刀鋸而暮鼎鑊兮上曖昧而下墨眉尿癡些君兮歸來故都慎不可留些余昔爲比干之魄兮干僂而余去些未聞于貪生以自招兮余竟絜其所處些君兮歸來故都慎不可留些余昔爲伍胥之魂兮胥僂而余逝些未聞胥貪位以惜生兮孰屬鏤而不滯些君兮歸來故都慎不可留些余昔爲弘演之魂兮演自殘而余行些余未聞演惜命以不死兮俾其義而益明些君兮歸來故都慎不可留些帝命余以輔君兮亦以君之忠介些今以忠而見聞兮尙盤桓而有待些將自富貴而入羈旅兮其志乃悔些將戀骨肉而惜家族兮何不自裁些梟

食母而獍食父兮見禽獸之爲生些苟舛殘者眉壽兮實梟獍而
同名些君乎慎勿懷故都之戀歸來乎余爲君存千古忠烈之榮
枯些

悼賈并序

余嘗讀賈誼新書見其經濟之道大矣哉眞命世王佐之才也自
漢氏革嬴高祖得於矢石不暇延儒人及爲天子制缺度弛處華
而夷是時獨有叔孫生能定朝儀其制未悉唯生草其書欲以制
屈諸侯推定正朔調革輿服通流貨幣天不祐漢絳灌興謗竟枉
其道出傅湘沅生自以不得志哀屈平之放逐及渡湘沈文以弔
之故其辭曰摘九州而相君兮何必懷此故都噫余釋生之意
矣當戰國時屈平不用於荆則有齊趙秦魏矣何不捨荆而相他
國乎余謂平雖遭靳尚子蘭之讒不忍捨同姓之邦爲他國之相
宜矣然則生之見棄又甚於平當漢時捨文帝則諸侯矣如適諸
侯則新書之文抑諸侯而尊天子也捨諸侯則胡越矣如適胡越

則新書之文滅胡越而崇中夏也是以其心切其憤深其詞隱而
麗其藻傷而雅余悲生哀平之見棄又生不能自明其道嗚呼聖
賢之文與道也求知與用苟不在於一時而在於百世之後者乎
其生之哀平歟余之悲生歟吾之道也廢與用幸未可知但不知
百世之後得其文而存之者復何人也咸通癸未中南浮至沅湘
復沈文以悼之其辭曰

粵炎緒之媯縣兮其國度之未彰天錫生以命理兮冀其道之益
光偉吳公之知賢兮道其名於文皇既轉刃啟軫以召之兮遂位
之於上庠愍耄儒之蠢愚兮對天問之不臧既羣儒之讓俊兮馳
其譽之煌煌嗟大漢之不緒兮糾其賢於汗潢上下溷而不分兮
議制削於驕王殺僂楚而不制兮斷粹胡與寇攘羌虜全以侵華
兮曾不能以抑強餌其嗜之延延兮寔三代之計良念五德之更
承兮論臚結而不綱乃秉臆以興說兮數用五而色尙黃又諸侯
以開國兮輸其租於咸陽曾不得以撫民兮俾其君兮何忘請紆

綱以乘印兮各馳化於所疆上既悅而欲大用兮遭絳灌與東陽
道既擯兮何明乃出傳於沅湘浮沅波之翕漚兮或漾棹以夷猶
望靈均之沒所兮顛其心之怛怛尺臨汨羅之浩漾兮想懷沙
之幽憂森穆蘿以翳鬱兮時迸狄以相號霧雨暗乎北渚蝸蠅毒
乎芳洲景黯沮以不明兮若天悼乎離騷香依依兮杜若韻淒淒
兮築筲山隱隱以掃空兮煙微微而淡秋羌吾不知所感兮淚憤
恨以橫流當抱蟻於渺瀰兮曾無足以少休既焚亂以傷思兮又
鳩鷓以動愁嗚呼哀哉世既不平領吾道以爲非兮吾復何依蘋
蘭憔悴兮稂莠繁滋麟鳳匿迹兮梟獍騰威憤匠罷斧兮拙者構
之離婁閉目兮瞽者揚眉子都蒙袂兮敦洽騁姿嗚呼哀哉亦先
生之尤也貽丑其世之不可兮何不解而去位又垂萬世之名兮
取捨在此奚自取謗於童叟兮乃憫然而爲累蓋伊尹三就五就
之心兮冀其民之可治柰惛惛以不悟兮又被之以非議幸一人
之再覺兮荅受釐之奧義既屏王以墮駕兮乃寃慟而已矣訊曰

君不明兮莫我知幽都寂兮和涕歸文懸日月兮俟後聖用之大
故忽兮其何足悲

江有楓一篇十章 并序

蕭穎士

江有楓思陸鄭二友吳會舊遊且疾讒也君宦于尹府以直方不
偶見偏讒佞惟古之賢者有避色避言之義矯然去之二室之間
有槭樹焉與江南楓形胥類憩於其下而作是詩以貽夫二三子

焉

江有楓其葉蒙蒙我友自東于以遊從山有槭其葉漠漠我友徂
北于以休息想彼槭矣亦類其楓矧伊懷人而忘于東東可遊矣
會之邱矣于山于水于廟于寺于亭于里君子遊焉于以宴喜其
樂豐豐粵東可居彼吳之墟有田有庭有朋有書有尊有魚君子
居焉惟以宴醕其樂徐徐我朋在矣彼陸之子彼陸之子如松如杞
淑問不已我友于征彼鄭之子彼鄭之子如琇如英德音孔明我思
震澤菱芡幕幕寤寐如覲我思剡谿杉篠萋萋寤寐無迷有鳥有

鳥粵鷗與鷺浮湍戲渚皓然絜素忘其猜妬彼何人斯曾足傷懼
此懼維何懼寘于羅彼驕者子讒言孔多我聞先師體命委和公
伯之愬則如子何悵然山河惟以嘯歌其憂也哉

菊榮一篇五章并序

菊榮酬贈離且申志也久寓大邑賢宰宋侯惠而好予賦鳴蟬以
貺別有懷相規備厥卒章于以報焉
采采者菊芬其榮斯紫英黃萼照灼丹墀愷悌君子佩服攸宜王
國是維大君是毗宋即太尉文貞公之子也貽爾子孫百祿萃之
采采者菊于邑之城舊根新莖布葉垂英彼美淑人應家之頑有
弦既鳴我政則平宜爾棟崇必復其慶
采采者菊于邦之府陰槐翳柳邇楹近宇彼勞者子喧卑是處慨
其莫知蘊結誰語企彼高人色斯遐舉
采采者菊于賓之館既低其枝又弱其榦有匪君子是焉披翫良
辰旨酒宴飲無算愴其此別終然永歎

歲方宴矣霜露殘促誰其榮斯有英者菊豈微春華懿此貞色人
之侮我混于薪棘詩人有言好是正直

有竹一篇七章并序

有竹懿李新後閣而讌親友也
有竹斯竿于閣之前君子秉心惟其貞堅兮有竿斯竹于閣之側
君子秉操惟其正直兮彼蔚者竹蕭其森矣有開者閣宛其深矣
迴簷幽砌如翼如齒冬之宵霰雪斯灑我有金鑪熨其以歆夏之
日炎景斯鬱我有珍簟淒其以栗彼紛者務休其豫矣有旨者酒
歡其且矣友僚萃止跗萼載韡彼美公之姓兮那歎應積慶兮期
子惟去之柄兮

蟬鳴一篇五章并序

蟬鳴感秋興送將歸也僻守外邑而蘭陵子相過詰朝言歸賦詩
見志以申贈焉
蟬其鳴矣于彼疏桐庇影容跡何往不容嘒嘒其長永託于風未

見君子我心忡忡既見君子樂且有融
彼蟬鳴矣于林之表含風飲露以樂吾道有懷載遷伊誰云保未
見君子我心悄悄既見君子披豁予抱
蟬鳴蟬鳴幽暢乎而肅肅爾庭遠近涼颺言赴高柳叢篁間之思
而不見如渴如飢亦既覲止我心則夷
蟬鳴伊何時運未與匪歎秋徂怨斯路阻願言莫從鬱悒誰語君
子至止慰我延佇何斯違斯修爾遐舉
歲之秋深蟬其夕吟披衣軒除蕭蕭風林我友來斯言告離衿何
以敘懷臨水鳴琴何以贈言委順浮沈

涼雨一章

并序

蕭穎士

涼雨志楊侯樂賓僚也

習習涼雨泠泠浮颺君子樂胥于其賓僚有女斯天式歌且謠歡
言終宵惟以招邀于胥樂兮

虞獲子鹿一章

并序

韋應物

虞獲子鹿憫園鹿也遭虞之機張見畜於人不得遂其天性焉
虞獲子鹿畜之城陬園有美草池有清流但見蹙蹙亦聞呦呦誰
知其思巖谷云游

上古之什補亡訓傳十三章

顧況

上古懲農也

遐哉上古生棄與柱句龍氏主乃有甫田惟彼甫田有萬斯年開
利之源無乃塞源一塵亦官百塵亦官嗇夫孔艱浸兮曠兮申有
螽兮惟馨祀是患豈止餒與寒嗇夫咨咨稊盛苗衰耕之耰之穰
穰鋤犁手胼足胝水之蛭螾吮喋我肌我姑自思胡不奮飛東人
利百西人利百有匪我心胡為不易河水活活萬人逐末俾爾之
愉悅兮

上古一章

左車憑險也

震為雷兄長之左東方之師也
憑險不已君子憂心而作是詩

左車有慶萬人猶病曷何去之于黨孔盛敏爾之生胡為波迸

文萃十一

左車有赫萬人毒螫曷可去之于黨孔碩敏爾之生胡爲草戚

左車二章

築城刺臨戎也寺人臨戎以墓塋爲城壁

築城登登于以作固咨爾寺兮發郊外冢墓死而無知猶或不可

若其有知惟上帝是愬築城奔奔于以固敵咨爾寺兮發郊外冢墓死而無知猶或不可

築城二章

持斧啟戎士也戎士伐松柏爲蒸薪孝子徘徊而作是詩

持斧持斧無剪我松柏兮

持斧一章

十月之郊造公室也君子居公室當思布德行化焉

十月之郊羣木肇生陽潛地中舒達句萌曠其蔚兮不可以遊息乃爰蒺藜乃夷荆棘乃繇彼曲直匠氏度思登斧以時澤梁蒸蒸

無或天枝有巨根帶生混茫際呼吸羣籟萬人揮斤坎坎有厲陸遷水濟百力殫弊審方面勢姑博其製作爲公室公室既成禦燥溼風日棟之斯厚懷之斯密如翼于飛如鱗櫛比繚以周墉城以崇階俯而望之蠹與雲齊礪硤硤藻井旋題丹素之煥兮椒桂之馥兮高閣高閣珠綴絡金鋪爛若不集于鳥雀繪事告畢賓筵秩秩乃命旨酒琴瑟琴瑟在堂莫不靜謐周環掩闕仰不漏日冬日巖凝言納其陽和風載昇夏日鬱蒸言用于陰涼風颯興有匪君子自賢不已乃夢乘舟乃夢乘車夢人占之更爽其居炎災則移皎皎則虧木實之繁兮明年息枝爰處若思胡寧不爾思

十月之郊一章

燕于巢審日辰也

燕于巢綴葺維戊甲兮乙兮不宜有謬飛龍在天雲掩于斗曷日于雨乃曰庚午彼日之差亦孔斯醜昔在羲和涵淫不修我筮我龜莫我告繇眉迺征之舜倫九疇君子授律是禡是禴三五不

備罔克攸遂惠此蒸人毋廢爾事爾莫我從維來者是冀

燕于巢一章

蘇方諷商胡舶舟運蘇方歲發扶南林邑至齊國立盡

蘇方之赤在胡之舶其利乃博我土曠兮我居闕兮我衣不白兮
朱紫爛兮傳瑞暉兮相唐虞之維百兮

蘇方一章

陵霜之華傷不實也

陵霜之華我心憂嗟陰之勝矣而陽不加塊軋陶鈞乃帝乃神乃
舒乃屯烈烈嚴秋熙熙陽春職生有倫今華發非其辰辰屬東方
之仁遐想三五黃帝登雲堯年百餘二儀分位六氣不渝二景如
璧五星如珠陵霜之華兮何不妄敷

陵霜之華一章

罔哀閭也

罔音閭俗呼子
為罔父為郎罷

罔生閩方閩吏得之乃絕其陽為臧為獲致金滿屋為髡為鉗如

視草木天道無知我罹其毒神道無知彼受其福郎罷別罔吾悔
生汝及汝既生人勸不舉不從人言果獲是苦罔別郎罷心摧血
下隔地絕天及至黃泉不得在郎罷前

罔一章

我行自東不遑居也

我行自東山海其空旅棘有叢我行自西壘與雲齊雨雪淒淒我
行自南烈火滿林日中無禽霧雨淫淫我行自北燭龍寡色何枉
不直我憂京京何道不行兮

我行自東一章

採蠟怨奢也荒巖之間有以續蒙其身腰藤造險及有羣蜂肆毒
哀呼不應則上捨藤而下沈壑

採採者蠟于泉谷兮煌煌中堂列華燭兮新歌善舞弦柱促兮荒
巖之人自取其毒兮

採蠟一章

倬彼我系九首

并序兄

王勃

倬彼我系舍弟虢州參軍勃所作也傷迫乎家貧道未成而受祿不得如古之君子四十強而仕也故本其情性源其事業因陳先人之迹以議出處致天爵之艱難也
倬彼我系出自有周分疆錫社派別枝流居衛仕宋匡羸相劉迺武迺文或公或侯
晉麻崩坼衣冠擾弊粵自太原播徂江滢禮喪賢隱時屯道閉王室如燬生人多瘡
伊我有器思逢其主自東旋西擇木開宇田彼河曲家乎汾浦天未厭亂吾將誰輔
伊我祖德思濟九埏不常厥所于茲五遷欲及時也天豈願焉其位雖屈其言則傳
爰述帝制大蒐王道曰天曰人是祖是考禮樂咸若詩書具草貽厥孫謀永爲家寶

伊余小子信慙明哲彼網有條彼車有轍思屏人事克終前烈于嗟代網卒余來綬
來綬伊何謂余曰仕我瞻先達三十方起夫豈不懷高山仰止願言毓德啜菽飲水
有烏反哺其聲嗷嗷言念舊德憂心忉忉今我不養歲月其潛僮俛從役豈敢告勞
從役伊何薄求卑位告勞伊何來參卿事名存實爽負信愆議靜言遐思中心是愧

元和聖德詩一首

并序

韓愈

臣愈頓首再拜言曰臣伏見皇帝陛下卽位以來誅流姦臣朝廷清明無有欺蔽外斬楊惠琳劉闢以收夏蜀東定青徐積年之叛海內怖駭不敢違越郊天告廟神靈歡喜風雨明晦無不從順太平之期適當今日臣蒙被恩澤日與羣臣序立紫宸殿下親望穆穆之光而其職業又在以經籍教導國子誠宜率先作歌詩以稱

道盛德不可以詞語淺薄不足以自效為解輒依古作四言元和聖德詩一篇凡千有二十四字指事實錄具載明天子文武神聖以驚動百姓耳目傳示無極其詩曰

皇帝即祚物無違拒曰暘而暘曰雨而雨維是元年有盜在夏欲覆其州以踵近武皇帝曰嘻豈不在我負鄙為艱縱則不可出師征之其眾十旅軍其城下告以福禍腹敗枝披不敢保聚擲首陣外降幡夜豎疆外之險莫過蜀土韋臯去鎮劉闢守後血人于牙不肯吐口開庫啗士曰隨所取汝張汝弓汝鼓汝鼓汝為表書求我帥汝事始上聞在列威怒皇帝曰然嗟遠士女苟附而安則且付與讀命于庭出節少府朝發京師夕至其部闢喜謂黨汝振而伍蜀可全有此不當受萬牛鬻鬻萬甕行酒以錦纏股以紅帔首有恒其凶有餌其誘其出穰穰隊以萬數遂劫東川遂據城阻皇帝曰嗟其又可許爰命崇文分卒禁禦有安其驅無暴我野日行三十徐壁其右闢黨聚謀鹿頭是守崇文奉詔進退規矩戰不貪

殺擒不濫數四方節度整兵頓馬上章乞討俟命起坐皇帝曰嘻無汝煩苦荆并洎梁在國門戶出師三千各選爾醜四軍齊作殷其如阜或披其角或脫其距長驅洋洋無有齟齬八月壬午闢棄城走載妻與妾包裹稚乳是日崇文入處其宇分散逐捕搜原剔藪闕窮見窘無地自處俯視大江不見洲渚遂自顛倒若杵投曰取之江中枷脰械手婦女纍纍啼哭拜叩來獻闕下以告廟社周示城市咸使觀觀解脫攀索夾以砧斧婉婉弱子赤立偃僕牽頭曳足先斷腰膂次及其徒體骸撐柱末乃取闢駭汗如寫揮刀紛紜爭剗膾脯優賞將吏枿珪綴組帛堆其家粟塞其庾哀憐陣歿廩給孤寡贈官封墓周帑宏溥經戰伐地寬免租簿施令酬功急疾如火天地中間莫不順序幽恆青魏東盡海浦南至徐蔡區外雜虜怛威赧德踧踏舞掉棄兵革私習簋簋來請來觀十百其耦皇帝曰吁伯父叔舅各安爾位訓厥眈晦正月元日初見宗祖躬執百禮登降拜俯薦于新宮視瞻梁杞戚見容色淚落入俎侍

祠之臣助我側楚乃以上幸於郊用牡除于國南鱗笱毛簾廬幕
周施開揭磊砢獸盾騰拏圓壇帖安天兵四羅旂常婀娜駕龍十
二魚魚雅雅霄昇于丘奠璧獻罍眾樂驚作轟豕融冶紫燄噓呵
高靈下墮羣星從坐錯落侈哆日君月妃煥赫嫫媿瀆鬼濛鴻嶽
祇業峩飢沃羶薌產祥降嘏鳳皇應奏舒翼自拊赤鱗黃龍透陀
結糾卿士庶人黃童白叟踊躍歡呀失喜噎歐乾清坤夷境落褻
舉帝車迴來日正當午幸丹鳳門大赦天下滌濯剗磔磨滅瑕垢
續功臣嗣拔賢任耆孩養無告仁滂施厚皇帝神聖通達今古聽
聰視明一似堯禹生知法式動得理所天錫皇帝為天下主并包
畜養無異細鉅億載萬年敢有違者皇帝勤儉盥濯陶瓦斥遣浮
華好此綈紵勅戒四方侈則有咎天錫皇帝多麥與黍無召水旱
耗于雀鼠億載萬年有富無窶皇帝正直別白善否擅命而狂既
翦既去盡逐羣姦靡有遺侶天錫皇帝庇臣碩輔博問遐觀以置
左右億載萬年無敢予侮皇帝大孝慈祥悌友怡怡愉愉奉太皇

后浹于族親濡及九有天錫皇帝與天齊壽登茲太平無怠永久
億載萬年為父為母博士臣愈職是訓詁作為歌詩以配吉甫

鄆州谿堂詩一首 并序

憲宗之十四年始定東平三分其地以華州刺史禮部尚書兼御
史大夫扶風馬公為鄆曹濮節度觀察等使鎮其地既一年褒其
軍號曰天平軍上即位之二年召公入且將用之以彼之人安於
公也復歸之鎮上之三年公為政於鄆曹濮也適四年矣治成制
定眾志大固惡絕於心仁形於色竭心力以供國家之職于時沂
密始分而殘其帥其後幽鎮魏不悅于政相扇繼變復歸於舊徐
亦乘勢逐帥自署同於三方惟鄆也截然中居四鄰望之若防之
制水恃以無恐然而皆曰鄆為虜巢且六十年將強卒武曹濮於
鄆州大而近軍所根柢皆驕以易怨而公承死亡之後撥拾之餘
剝膚椎髓公私埽地赤立新舊不相保持萬目睽睽公於此時能
安以治之其功為大若幽鎮魏徐之亂不扇而變此功反小何也

公之始至眾未熟化以武則忿而憾以恩則橫而肆一以為赤子
一以為龍蛇憊心罷精磨以歲月然後致之難也及教之行眾皆
戴公為親父母夫叛父母從仇讎非人之情故曰易於是天子以
為尚書右僕射扶風郡開國伯以褒嘉之公亦樂眾之和知人之
悅而侈上之賜也於是為堂於其居之西北隅號曰谿堂以饗士
大夫通上下之志既饗其從事陳曾謂其眾言公之畜此邦其勤
不亦至乎此邦之人纍公之化惟所令之不亦順乎上勤下順遂
濟登茲不亦休乎昔者人謂斯何今者人謂斯何雖然斯堂之作
意其有謂而暗無詩歌是不考引公德而接邦人於道也乃使來
請其詩曰
帝奠九壘有葉有年有荒有條河岱之間及我憲考一牧正之視
邦選侯以公來尸公來尸之人始未信公不飲食以訓以徇孰飢
無食孰呻孰歎孰寃不問不得分願孰為邦蠹節根之螟羊很狼
貪以口覆城吹之煦之摩手拊之箴之石之膊而磔之凡公四封

既富以強謂公吾父孰違公令可以師征不寧守邦公作谿堂播
播流水淺有蒲蓮深有蒹葦公以賓燕其鼓駭駭公燕谿堂賓校
醉飽流有躍魚岸有集鳥既歌以舞其鼓考考公在谿堂公御琴
瑟公暨賓贊稽經誼律施用不差人用不屈谿有賓蒞有龜有魚
公在中流右詩左書無我戮遺此邦是麻

漢隄詩一首

并序

盧肇

上元年秋漢水大溢齧襄隄以入既沈漢鄂遂滅岷趾棟榱且流
壓溺無算襄之城僅以門免三日水去陷為大塗餘民棲于楚山
號不敢下餒躓相挽其能全者什六七上大憂曰襄惟東南實脰
荆海若氣不息吾躬曷瘳今天下之降下災于有漢庭垣盡諸齒豁
在淖有嬰墜井母實號之今襄臣盡墜吾號尚及哉咨乃卿士疇
能振之以易吾亂咸以地官范陽公舊理南粵島夷率化甘于民
心俾踐于襄必克底义上俞以往公既至省漢之溺由舊防之不
固幾五十載又詢之漢水之不犯襄鄂惟是甚災既魚土庶災或

能嗣孰以遏之募民新漢之隄食敵其功資三其食因故隄之地
廣倍之高再倍之距襄之郊繚半百里明年春隄成公具以疏上
大歡復襄之疲民一祀賑穀十萬斛民既保寧謳歌怡愉既而舒
蘇不知曩之災也昔狄敗衛侯于熒澤齊桓公帥諸侯城緣陵以
居之而衛國忘亡君子是以稱桓公之德今公之爲是隄也襄有
衛人之思焉而況宣天子之慈以生厥民曷齊桓之尙哉噫五材
之生沴也必極于物物之既極天必資明哲以蘇之理之常也古
之人有力保一邑勇禦一寇謂之有功尙以金石載之況捍大災
救大患其美若是豈得無稱焉是宜以聲詩播之登于樂府惟漢
亦有瓠子之歌是可類之謹按正考甫作商詩公子奚斯命太史
克請于周作魯詩皆其國之公族也肇於公爲族孫幸力於文所
不宜默惟峴之碑曰羊公惟隄之詩曰盧公是古今之相光昭也
其誰曰不然詩曰
陰沴奸陽來暴于襄洎入大郭波端若鉞觸厚摧高不知其防駭

潰顛委萬室皆毀竈登蛟鼉堂集鱣鮪惟恩若讎母不能子洪潰
既涸閔其虛已隳我堵以剝我廬酸傷顧望若踐邱墟帝曰念
嗟朕曰南顧流災降慝天曷台怒滔滔襄郊梓我嬰孺於惟餘毗
飢傷喘呼歎斯爲淫夷孰往膏傅惟汝元寮僉舉明哲我公用諧
苴茅杖節來視襄人煥許六然切提挈不日不月哈乎抃悅乃
詠故隄陷于沙泥缺落坳坳由東訖西公曰嗚呼漢之有隄實命
之命襄人不力乃力則及乃身具鋪與畚漢隄其新帝廩有粟帝
府有緡爾成爾隄必錫爾勤襄人怡怡聽命襄許背囊肩杵奔走
蹈舞分之卒伍令以麾鼓尋尺既度日月可數登登業業周旋上
下披峴楚峴二山飛石輓土舉築殷雷駭汗霏雨疲癯鰥獨
奮有筋臂呀呀來助提筐負管不勞其勞雜沓笑語咸曰盧公來
賜我生斯隄既成蜿蜿而平確爾山固屹如雲橫漢流雖狂堅不
可蝕代千年億與天無極惟公之隄昔在人心既築既成橫之于
南萌渚不峻此門不深今復在茲于漢之陰斯隄已崇茲民獲祐

觀童相慶室以完富貽于襄人願保厥壽繫公之功赫焉如畫捍此巨災崒若京阜天子錫之百姓載之族孫作詩昭示厥後

有所恨二章 并序

歐陽詹

有所恨由故人馬紳死而興也予待試京師六年與馬生相知者四秋性與情相合也衣與食相同也予及第歸覲故園自別來無憶不至於襟懷無想不至於姿容願一促膝怒如也昨既至止馬生且疾巫者忌以見人曰不見即愈見即害遂忍即見庶以求見忍者五日馬生云亡噫故人也昔越萬里猶求見焉惑乎一言蔽乎一垣而死生以之死生之道千秋之離也五日之面半旬之歡也尚可半旬之歡不就而卒甘千秋之離一恨也又與生別慘執都門生脫紫羅半臂曰即日相去秦吳聊以為憶子貧也素乏衣服不暇藏篋笥聯縣在身二年間同弊帛以棄所以新而輕著故而不留者予實未衰馬其方少爾斯日日相與也所留何止在茲乎今人既往所贈又造次而亡之二恨也申二恨為有所恨二章

云

我思君子吁嗟萬里亦既至止曷不覲止本不信巫而巫言是履在門五日如待之死有所恨兮

我思遺衣為憶以貽亦既受持曷不保持本不欺友而友情是違隔生之贈造次亡之有所恨兮

河之水二章寄姪老成

韓愈

河之水去悠悠我不如水東流我有孤姪在海陬三年不見兮使

我生憂日復日夜復夜三年不見汝使我鬢髮未老而先化

河之水悠悠去我不如水東注我有孤姪在海浦三年不見兮使

我心苦采蕨于山緡魚于泉我徂京師不遠其還

文粹卷第十一

文粹

七

文粹卷十二
 十一
 汝臣

文粹卷第十二

吳興 姚鉉 纂

詩三 總八十六首

樂府辭上

功成作樂

七德舞 白居易

古樂

湘絃怨 孟郊

箜篌引 王昌齡

箜篌謠 李白

感慨

放歌行 王昌齡

浩歌行 白居易

緩歌行 李頎

短歌行 李白

短歌行 張籍

善哉行 釋貫休

興亡

祖龍行 韋楚老

鄴都引 張說

永嘉行 張籍

後魏行 王載

幽怨

湘妃怨 陳羽

銅雀臺歌 劉長卿

銅雀妓 歐陽詹

魏宮詞 崔國輔

王昭君歌 劉長卿

王昭君 盧照鄰

婕妤怨 王維

長信宮 崔國輔

怨詞

苦樂相倚曲 元稹

妾薄命 李白

白頭吟 張籍

貞節

烈女操 孟郊

節婦吟 寄東平李司空 張籍

織女詞 元稹

靜女詞 孟郊

寄衣曲 張籍

白紵歌

愁恨

征婦怨 張籍

春思 李白

春別曲 張籍

古樂府雜怨 三首孟郊

長干行 李白

古薄命妾 孟郊

母別子 白居易

夜夜曲 釋貫休

艱危

蜀道難 李白

行路難 張籍

行路難 三首李白

變行路難 王昌齡

太行路 白居易

梁甫吟 李白

走馬引 李賀

孟門行 崔顥

沐浴子 李白

邊塞

將軍行 劉希夷

將軍行 張籍

霍將軍 崔顥

老將行 王維

雁門太守行 李賀

從軍行 六首劉長卿

塞上曲 戎昱

塞下曲 郎士元

塞下曲 王季友

出塞曲 劉灣

燕歌行 高適

燕支行 王維

隴頭吟 白居易

陰山道 李白

胡無人 李白

飲馬長城窟 釋子蘭

關山月 張籍

古長城吟 王翰

長城作 鮑溶

古築城曲 五首 元稹

築城詞 張籍

築城詞 二首 陸龜蒙

聽董大彈胡笳聲兼寄語弄房給事 李頎

七德舞 美撥亂陳王業也

白居易

七德舞七德歌傳自武德至元和元和和小臣白居易觀舞聽歌知

樂意曲終稽首陳其事太宗十八舉義兵白旄黃鉞定兩京擒充

戮竇四海清二十有四功業成二十有九即帝位三十有五致太

平功成理定何神速在推心致人腹亡卒遺骸散帛收貞觀初

下陣亡者致祭而瘞之飢人賣子分金贖貞觀二年大飢人有賣

尋又散金帛而購埋之魏徵夢見子夜泣是夕徵疾亟太宗製碑與

還其父以魏徵夢見子夜泣是夕徵疾亟太宗製碑與徵別既寤高宗

得良嗣於夢中張謹哀聞辰日哭司奏日陰陽所忌辰日不哭

今失賢臣於義重猶父子也怨女三千放出宮婦人幽閉深宮情

情發於衷安知辰日乃哭之怨女三千放出宮婦人幽閉深宮情

實可愍今將出之任求仇讎於是令左丞戴胄死囚四百來歸獄

貞觀六年親錄囚徒刑及期而遂詔悉原之翦鬚燒藥賜功臣

李勣嗚咽思殺身翦鬚燒藥賜功臣血吮瘡撫戰士思摩奮呼乞効死

文萃十一

四

戰善乘時以心感人人
心歸爾來一百九十載
天下至今歌舞之歌七
德舞七德聖人有作垂
無極豈徒耀神武豈徒
誇聖文太宗意在陳王
業王業艱難示子孫

湘絃怨

孟郊

昧者治春草蕭蘭同一
鋤盲臆怨秋林曲直同
一枯嘉禾忌深蠹直人
悲巧誣靈均入迴流靳
尚爲良謨願我分眾泉
清濁各有渠願我分眾
巢梟鸞相遠居此志諒
難保此意誠何如

箜篌引

王昌齡

盧谿郡南夜泊舟夜聞
兩岸羌戎謳其時月黑
猿啾啾微雨霑衣令人
愁有一遷客登高樓不
言不寐彈箜篌彈作薊
門桑葉秋風沙颯颯青
冢頭將軍鐵驄汗血流
深入匈奴戰未休黃旗
一點兵馬收亂殺胡人
積如邱瘡病驅來配邊
州仍披漠北羔羊裘顏
色飢枯掩面羞眼眶淚
滴深兩眸思還本鄉食
菴牛欲語不得指咽喉
或有強壯能伊憂意說
被他邊將讎五世屬蕃
漢主留碧毛氈

帳河曲遊囊馳五萬部
落稠敕賜飛鳳金兜鍪
爲君百戰如過籌靜掃
陰山無鳥投家藏鐵券
特承優黃金千斤不稱
求九族分離作楚囚深
谿寂寞絃苦幽草木悲
感聲颼颼僕本山東爲
國憂明光殿前論九疇
篋讀兵書盡冥搜爲君
掌上施權謀洞曉山川
無與儔紫宸發詔遠懷
柔搖筆飛霜如奪鉤鬼
神不得知其由憐愛蒼
生比蚍蜉朔河頓兵須
漸抽盡遣降來拜御溝
便令海內休戈矛何用
班超定遠侯史臣書之
得已不

箜篌謠

李白

攀天莫登龍走山莫騎
虎貴賤交結心不移唯
有嚴陵及光武周公稱
大聖管蔡寧相容漢謠
一斗粟不與淮南春兄
弟尙路人吾心安所從
他人方寸間山海幾千
重輕言託朋友對面九
疑峯多花必早落桃李
不如松管鮑久已死何
人繼其蹤

放歌行

王昌齡

南渡洛陽津西望十二
樓明堂坐天子月朔朝
諸侯清樂動千門

皇風被九州慶雲從東來
泱泱抱日流昇平貴論道
文墨將何求有詔徵草澤
微誠將獻謀冠冕如星羅
拜揖曹與周望塵非吾事
入賦且遲留幸蒙國士識
因脫負薪裘今者放歌行
以慰梁甫愁但榮數斗祿
奉養母豐羞若得金膏遂
飛雲亦可儔

浩歌行

白居易

天長地久無終畢昨夜今朝又
明日鬢髮蒼浪牙齒疎不覺身年
四十七前去五十有幾年把鏡照
面心茫然既無長繩繫白日又
無大藥駐朱顏朱顏日漸不如故
青史功名在何處欲留年少待
富貴富貴不來年少去去復去
兮如長河東流赴海無迴波賢愚
貴賤同歸盡北邙冢墓高嵯峨
古來如此非獨我未死有酒且高
歌顏回短命伯夷餓我今所得亦
已多功名富貴須待命命若不知
來知奈何

緩歌行

李頎

小來託身攀貴遊傾財破產無所憂
暮擬經過石渠署朝將出入

銅龍樓結交杜陵輕薄子謂言可生復可死
一沉一浮會有時棄我翻然如脫屣
男兒立身須自強十年閉戶頴水陽
業就功成見明主擊鍾鼎食坐華堂
二八蛾眉梳墮馬美酒清歌曲房下
文昌宮中賜錦衣長安陌上退朝歸
五陵賓從莫敢視三省官寮揖者稀
早知今日讀書是悔作從前狂俠非

短歌行

李白

白日何短短百年苦易滿蒼穹浩茫茫
萬劫太極長麻姑垂兩鬢一半已成霜
天公見玉女大笑億千場吾欲攬六龍
迴車挂扶桑北斗酌美酒勸龍各一觴
富貴非所願為人駐顏光

短歌行

張籍

青天蕩蕩高且虛上有白日無根株
流光暫出還入地使我少年不須與君
相逢忽寂寞衰老不復如今樂玉卮
盛酒置君前再拜願君千萬年

善哉行

釋貫休

有美一人兮婉如清陽識曲別音兮令姿煌煌繡袂捧琴兮登君子堂如彼萱草兮使我憂忘欲贈之以紫玉尺白銀璫久不見之兮湘水茫茫

祖龍行

章一作楚老

黑雲障天射天裂壯士朝眠夢寃結祖龍一夜死沙邱胡亥空隨鮑魚轍腐肉偷生二千里偽書先賜扶蘇死墓接驪山土未乾瑞光已向芒碭起陳勝城中鼓三下秦家天地如崩瓦龍虵撩亂入咸陽少帝空隨漢家馬

鄴都引

張說

君不見魏武曹公一作草創爭天祿羣雄睚眦相馳逐晝攜壯士破堅陣夜接詞人賦華屋都邑繚繞西山陽桑榆汗漫漳河曲城郭為墟人代改但有西園明月在鄴傍高冢多貴臣蛾眉曼睩其灰塵試上銅臺歌舞處唯有秋風愁殺人

永嘉行

張籍

黃頭鮮卑入洛陽胡兒持一作執戟昇明堂晉家天子作降虜公卿奔走如牛羊紫陌旛暗相觸家家雞犬驚上屋婦人出門隨亂兵夫死眼前不敢哭九州諸侯自顧土無人領兵來護主北人避胡多在南南人至今能晉語

後魏行

王穀

力微皇帝謗天嗣大武凶殘人所畏一朝粘羆飛上天子孫盡作河魚餌

湘妃怨

陳羽

二妃怨處雲沈沈二妃哭處湘江深商人酒滴廟前草蕭颯風生斑竹林

銅雀臺歌

劉長卿

嬌愛更何日高臺空數層含啼映雙袖不忍看西陵漳河東流無復來百花輦路為蒼苔青樓月夜長寂寞碧雲日暮空徘徊君不見鄴中萬事非昔時古人不在今人悲春風不逐君王去草色年

年舊宮路宮中歌舞已浮雲空指行人往來處

銅雀妓

歐陽詹

蕭條登古臺迴首黃金屋落葉不歸林高陵永爲谷妝容徒自麗
舞態悅誰目惆悵總帷前歌聲苦於哭

魏宮詞

崔國輔

朝日照紅妝擬上銅雀臺畫眉猶未了魏帝使人催

王昭君歌

劉長卿

自矜嬌豔色不顧丹青人那知粉纈能相負卻使容華翻誤身上
馬辭君嫁驕虜玉顏對人愁不語北風鴈急浮雲秋萬里獨見黃
河流纖腰不復漢宮寵雙蛾長向胡天愁琵琶絃中苦調多蕭蕭
羌笛聲相和誰憐一曲傳樂府能使千秋傷綺羅

王昭君

盧照鄰

合殿恩中絕交河使漸稀肝腸辭玉輦形影向金徽漢宮草應綠
胡庭沙正飛願逐三秋鴈年年一度歸

婕妤怨

王維

宮殿生秋草君王恩幸疏那堪聞鳳吹門外度金輿

長信宮

崔國輔

長信宮中草年年愁處生時侵珠履跡不使玉階行

怨詞

妾有羅衣裳秦王在時作爲舞春風多秋來不堪著

苦樂相倚曲

元稹

古來苦樂之相倚近於掌上之十指君心半夜猜恨生荆棘滿懷
天未明漢王眼瞥飛燕時可憐班女恩已衰未有因由相決絕猶
得半年佯暖熱轉將深意諭傍人緝綴疵瑕遣譜說一朝詔下辭
金屋班姬自痛何倉卒呼天拊地將自明不悟尋時暗銷骨白首
宮人前再拜願將日月相輝解苦樂相尋晝夜閒鑑光那有天明
在主今被奪心應苦妾奪深恩初爲主欲知妾意恨主時主今爲
妾思量取班姬收淚抱妾身我曾排擯無限人

妾薄命

李白

漢帝重阿嬌貯之黃金屋咳唾落九天隨風生珠玉寵極愛還歇
妒深情卻疏長門一步地不肯暫迴車雨落不上天水覆難再收
君情與妾意各自東西流昔日芙蓉花今成斷腸一作草以色事
他人能得幾時好

白頭吟

張籍

請君膝上琴彈我白頭吟憶昔君前嬌笑語兩情宛轉如縈素宮
中爲我起高樓更開花池種芳樹春天百草秋始衰棄我不待白
頭時羅襦玉珥色未暗今朝已道不相宜揚州青銅作明鏡暗中
持照不見影人心迴互自無窮眼前好惡乃能定君恩已去若再
返菖蒲花開月長滿

烈女操

孟郊

梧桐相待老鴛鴦會雙死貞女貴徇夫捨生亦如此波瀾誓不起
妾心井中水

節婦吟寄東平李司空

張籍

君知妾有夫贈妾雙明珠感君纏綿意繫在紅羅襦妾家高樓連
苑起良人執戟明光裏知君用心如日月事夫誓擬同生死還君
明珠雙淚垂何不相逢未嫁時

織女詞

元稹

織婦何太忙蠶經三臥行欲老蠶神女聖早成絲今年絲稅抽徵
早早徵非是官人惡去歲官家事戎索征人戰苦東刀瘡主將勳
高換羅幕線絲織帛猶努力變緝療機苦難織東家頭白雙女兒
爲解挑紋嫁不得余採荆時日擊貢綾簷前裏裏游絲上有蜘蛛
巧來往羨他蟲豸解緣天能向虛空織羅網

靜女詞

孟郊

豔女皆妒花靜女獨檢蹤任體恥任妝嫁德不嫁容君子未求娉
小人難相從此志誰與說琴絃幽韻重

寄衣曲

張籍

織素縫衣獨苦辛遠因迴使寄征人官家亦自寄衣去貴從妾手
著君身高堂姑老無侍子不得自到邊城裏殷勤爲看初著時征
夫身上宜不宜

白紵歌

皎皎白紵白且鮮將作春衣稱少年裁縫長短不能定自持刀尺
向姑前復恐蘭膏污纖指常遣傍人收墮珥衣裳著時寒食下還
把玉鞭鞭白馬

征婦怨

九月匈奴殺邊將漢軍全歿遼水上萬里無人收白骨家家城下
招魂葬婦人依倚子與夫同居貧賤心亦舒夫死戰場子在腹妾
身雖存如晝燭

春思

李白

燕草如碧絲秦桑低綠枝當君懷歸日是妾斷腸時春風不相識
何事入羅帷

春別曲

張籍

長江春水綠堪染蓮葉出水大如錢江頭橘樹君自種那長繫
木蘭船

古樂府雜怨三首

孟郊

天桃花清晨遊女紅粉新天桃花薄暮遊女紅粉故樹有百年花
人無一定顏花送人老盡人悲花自閒
貧女鏡不明寒日花少容暗蛩有虛織短線無長縫淚水不可照
狂夫不可從浪水多散影狂夫多異蹤持此一生薄空成萬恨濃
憶人莫至悲至悲空自哀寄人莫剪衣剪衣未必歸朝爲雙蒂花
暮爲四散飛落花卻遶枝遊子不顧期

長干行

李白

妾髮初覆額折花門前劇郎騎竹馬來遶牀弄青梅同居長千里
兩小無嫌猜十四爲君婦羞顏未嘗開低頭向暗壁千喚不一迴
十五始展眉願同塵與灰常存抱柱信豈上望夫臺十六君遠行

瞿塘灩澦堆五月不可觸猿鳴天上哀門前遲一作行跡一一生
綠苔苔深不能掃落葉秋風早八月蝴蝶黃雙飛西園草感此傷
妾心坐愁紅顏老朝晚下三巴預將書報家相迎不道遠直至長
風沙

古薄命妾

孟郊

不惜十指絃爲君千萬彈常恐新聲至坐使故聲殘棄置今日悲
卽是昨日歡將新變故易持故爲新難青山有薜蘿蕪葉長不乾
空令後世人采掇幽思攢

母別子

白居易

母別子子別母白日無光哭聲苦關西驃騎大將軍去年破虜新
策勳敕賜金錢二百萬洛陽迎得如花人新人迎來舊人棄掌上
蓮花眼中刺迎新棄舊未足悲悲在君家有兩兒一始扶行一初
坐坐啼行哭牽人衣以爾夫妻新嫵婉使我母子生別離不如林
中鳥與鵲母不失雛雄伴雌又似園中桃與李花落隨風子在枝

新人新人聽我語洛陽無限紅樓女但願將軍重立勳更有新人
勝於汝

夜夜曲

釋貫休

蟪蛄切切風騷騷芙蓉噴香蟾蜍高孤燈耿耿征婦勞更深撲落
金錯刀

蜀道難

李白

噫噓噓危乎高哉蜀道之難難於上青天蠶叢及魚鳧開國何茫
然爾來四萬八千歲不與秦塞通人煙西當太白有鳥道可以橫
絕峩眉巔地崩山摧壯士死然後天梯石棧相勾連上有六龍迴
日之高標原作橫河斷海之浮雲下有衝波逆折之迴川黃鶴之飛尙不得
能過猿猱欲度愁攀絲青泥何盤盤百步九折縈巖巒捫參歷井
仰脅息以手拊膺坐長歎問君西遊何時還畏途巖岨不可攀但
見悲鳥號古木雄飛雌從遶林間又聞子規啼夜月愁空山蜀道
之難難於上青天使人聽此彫朱顏連峯去天不盈尺枯松倒挂

倚絕壁飛湍瀑流爭喧豗砮崖轉石萬壑雷其嶮也若此嗟爾遠道之人胡爲乎來哉劔閣崢嶸而崔嵬一夫當關萬夫莫開所守或匪親化爲狼與豺朝避猛虎夕避長蛇磨牙吮血殺人如麻錦城雖云樂不如早還家蜀道之難難於上青天側身西望長咨嗟

行路難

張籍

湘東行人長歎息十年離家歸未得弊裘羸馬苦難行僮僕饑寒少筋力君不見牀頭黃金盡壯士無顏色龍蟠泥中未有雲不能生彼昇天翼

行路難三首

李白

金樽清酒斗十千玉盤珍羞直萬錢停盃投箸不能食拔劔四顧心茫然欲渡黃河冰塞川將登太行雪暗天閒來垂釣碧谿上忽復乘舟夢日邊行路難行路難多岐路今安在長風破浪會有時直挂雲帆濟滄海大道如青天我獨不得出羞逐長安社中兒赤雞白狗賭梨栗彈

劔作歌奏苦聲曳裾王門不稱情淮陰市井笑韓信漢朝公卿忌賈生君不見昔時燕家重郭隗擁篲折節無嫌猜劇辛樂毅感恩分輸肝剖膽效英才昭王白骨縈蔓草誰人更掃黃金臺行路難歸去來

有耳莫洗穎川水有口莫食首陽蕨含光混世貴無名何用孤高比雲月吾觀自古賢達人功成不退皆隕身子胥旣棄吳江上屈原終投湘水濱陸機雄才豈自保李斯稅駕苦不早華亭鶴唳誰可聞上蔡蒼鷹何足道君不見吳中張翰稱達生秋風忽憶江東行且樂生前一盃酒何須身後千載名

變行路難

王昌齡

向晚橫吹悲風動馬嘶合前驅引旌節千里陣雲布單于下陰山砂磧空颼颼封侯取一戰豈復念閨閣

太行路

借夫婦諷君臣之不終也

白居易

太行之路能摧車若比君心是坦途巫峽之水能覆舟若比君心

是安流君心好惡苦不常好生毛羽惡生瘡與君結髮未五載豈
期牛女爲參商古稱色衰相棄背當時美人猶怨悔何況如今鸞
鏡中妾顏未改君心改爲君薰衣裳君聞蘭麝不馨香爲君盛容
飾君看金翠無顏色行路難難重陳人生莫作婦人身百年苦樂
由他人行路難難於山險於水不獨人間夫與妻近代君臣亦如
此君不見左納言右內史朝承恩暮賜死行路難行路難不在水
不在山祇在人情反覆間

梁甫吟

李白

長嘯梁甫吟何時見陽春君不見朝歌屠叟辭棘津八十西來釣
渭濱寧羞白髮照淶水逢時吐氣思經綸廣張三千六百鈞風期
暗與文王親大賢虎變愚不測當年頗似尋常人君不見高陽酒
徒起草中長揖山東隆準公入門不拜一作開說騁雄辯兩女輟洗來
趨風東下齊城七十二指麾楚漢如旋蓬狂生落魄向如此何況
壯士當羣雄我欲攀龍見明主雷公砰訇震天鼓帝旁投壺多玉

女三時大笑開電光倏爍晦冥起風雨閭闔九門不可通以額叩
關闈者怒白日不照吾精誠祀國無事憂天傾猘貽磨牙競人肉
騶虞不折生草莖手接飛猱搏彫虎側足焦原未言苦智者可卷
愚者豪世人見我輕鴻毛力排南山三壯士齊相殺之費二桃吳
楚弄兵無劇孟亞夫哈爾爲徒勞梁甫吟聲正悲張公兩龍劍神
物合有時風雲感會起屠釣大人峴岬當安之

走馬引

李賀

我有辭鄉劍玉鋒堪截雲襄陽走馬客意氣自生春朝嫌劍花淨
暮嫌劍光冷能持劍向人不解持照身

孟門行

崔顥

黃雀銜黃花翩翩傍簷隙本擬報君恩如何反彈射金罍美酒滿
座春平原愛才多眾賓滿堂盡是忠義士何意得有讒諛人諛言
翻覆那可道能令君心不自保北園新栽桃李枝根株未固何轉
移成陰結實君自取若問旁人那得知

沐浴子

李白

沐芳莫彈冠浴蘭莫振衣處世忌太潔至人貴藏暉滄浪有釣叟
吾與爾同歸

將軍行

劉希夷

將軍闢轅門耿介當風立諸將欲言事逡巡不敢入劍氣射雲天
鼓聲振原隰黃塵塞路起走馬追兵急彎弓從此去飛箭如雨集
截圍一百重斬首五千級代馬流血死胡人抱鞍泣古來養甲兵
有事常討襲乘我廟堂運坐使干戈戢獻凱歸帝京軍容何翕習

將軍行

張籍

彈箏峽東有胡塵天子擇日拜將軍蓬萊殿前賜六纛還領禁兵
為部曲當朝受詔不辭家夜向咸陽原上宿戰車彭彭旌旗動三
十六軍齊上隴隴頭戰勝夜亦行分兵處處收舊城胡兒殺盡陰
積暮擾擾唯有牛羊聲邊人親戚曾戰歿今逐官軍收舊骨積西
行見萬里空樂府獨奏將軍功

霍將軍

崔顥

長安甲第高入雲誰家居住霍將軍日晚朝迴擁賓從路旁揖拜
何紛紛莫言炙手手可熱須臾火盡灰亦滅莫言貧賤即可欺人
生富貴自有時一朝天子賜顏色世上悠悠應始知

老將行

王維

少年十五二十時步行奪取胡馬騎射殺陰山白額虎肯數鄴下
黃鬚兒一身轉戰三千里一劍曾當百萬師漢兵奮迅如霹靂虜
騎崩騰畏蒺藜衛青不敗由天幸李廣無功緣數奇自從棄置便
衰朽世事蹉跎成白首昔時飛箭無全目今日垂楊生左肘路傍
時賣故侯瓜門前學種先生柳蒼茫古木連窮巷寥落寒山對虛
牖誓令疏勒出飛泉不似潁川空使酒賀蘭山下陣如雲羽檄交
馳日夕聞節使三河募年少詔書五道出將軍試拂鐵衣如雪色
聊持寶劍動星文願得燕弓射天將恥令越甲鳴吾君莫嫌舊日
雲中守猶堪一戰立功勳

雁門太守行

李賀

黑雲壓城城欲摧
甲光向日金鱗開
角聲滿天秋色裏
塞上燕支凝夜紫
半卷紅旗臨易水
霜重鼓寒聲不起
報君黃金臺上意
提携攜玉龍為君死

從軍行六首

劉長卿

迴首虜騎合城下
漢兵稀白刃兩相向
黃雲愁不飛
手中無尺鐵徒欲突重圍
落日更蕭條
北風動枯草
將軍追虜騎
夜失陰山道
戰敗仍樹勳
韓彭但空老
草枯秋塞上
望見漁陽郭
胡馬嘶一聲
漢兵淚雙落
誰為吮瘡者
此事今人薄
目極鴈門道
青青邊草春
一身事征戰
疋馬同苦辛
末路成白首
功歸天下人
倚劍白日暮
望鄉登戍樓
北風吹羌笛
此夜關山愁
迴首不無意

滹河空自流

黃沙一萬里
白首無人憐
報國劍已折
歸鄉身幸全
單于古臺下
邊色寒蒼然

塞上曲

戎昱

樓上畫角哀
即一作知兵心苦
試問左右人
無言淚如雨
何意休明時終年事
鞞鼓

塞下曲

郎士元

寶刀塞上兒
身經百戰曾百勝
壯心竟未嫖姚知
白草山頭日初沒
黃沙戍下悲歌發
蕭條夜靜邊風吹
獨倚營門望秋月

塞下曲

王季友
一作陶翰

進退飛狐北
窮寇勢將變
日落沙塵昏
背河更一戰
駢馬黃金勒
雕弓白羽箭
射殺左賢王
歸奏未央殿
欲言塞下事
天子不召見
東出咸陽門
哀哀淚如霰

出塞曲

劉灣
一作濟

將軍在重圍音信絕不通羽書如流星飛入甘泉宮倚是并州兒
少年心膽雄一朝隨召募百戰爭王公去年桑乾北今年桑乾東
死是征人死功是將軍功汗馬牧秋月疲卒卧霜風仍聞左賢王
更欲圖雲中

燕歌行并序

高適

開元十年客有從御史大夫張公出塞而還者作燕歌行以示適
感征戍之因而和焉
漢家煙塵在東北漢將辭家破殘賊男兒本自重橫行天子非常
賜顏色縱金伐鼓下榆關旌旆逶迤碣石間校尉羽書飛瀚海單
于獵火照狼山山川蕭條極邊土胡騎憑凌雜風雨戰士軍前半
死生美人帳下猶歌舞大漠窮秋塞草腓孤城落日鬪兵稀身當
恩遇恆輕敵力盡關山未解圍鐵衣遠戍辛勤久玉筯應啼別離
後少婦城南欲斷腸征人薊北空迴首邊庭飄颻那可度絕域蒼
茫無所有殺氣三時作陣雲寒聲一夜傳刁斗相看白刃血紛紛

死節從來豈顧勳君不見沙場征戰苦至今猶憶李將軍

燕支行

王維

漢家天將才且雄來時謁帝明光宮萬乘親推雙闕下千官出饒
五陵東誓辭甲第金門裏身作長城玉塞中衛霍才堪一騎將朝
廷不數貳師功趙魏燕韓多勁卒關西俠少何咆勃報讎只是聞
嘗膽飲酒不曾妨刮骨畫戟瑠璃文白日寒連旗大旆黃塵沒疊鼓
遙翻瀚海波鳴笳亂動關山月麒麟錦帶佩吳鉤颯沓青驪躍紫
騮拔劍已斷天驕臂歸鞍共飲月支頭漢兵大呼一當百虜騎相
看哭且愁教戰雖令赴湯火終知上將先伐謀

隴頭吟

長城少年遊俠客夜上戍樓看太白隴頭明月迴臨關隴上行人
夜吹笛關西老將不勝愁駐馬聽之雙淚流身經大小百餘戰塵
下偏裨萬戶侯蘇武才爲典屬國節旄空盡海南頭

陰山道

白居易

陰山道陰山道紆邏敦肥水泉好每至戎人送馬時道傍千里無
纖草草盡泉枯馬病羸飛龍但印骨與皮五十疋繚易一疋繚去
馬來無了日養無所用土非宜每歲死傷十六七繚絲不足女工
苦疏織短裁充足數藕絲蛛網三丈餘迴鶻訴稱無用處咸安公
主號可敦遠爲可汗頻奏論元和二年下新敕內出金帛酬馬直
仍詔江淮馬價繚從此不令疏短織合羅將軍呼萬歲捧授金銀
與繚絲誰知黠虜啟貪心明年馬來多一倍繚漸好馬漸多陰山
虜柰爾何

胡無人

李白

嚴風吹霜海草凋筋幹精堅胡馬驕漢家戰士三十萬將軍兼領
霍嫖姚流星白羽腰間插劍花秋蓮光出匣天兵照雪下玉關虜
箭如沙射金甲雲龍風虎盡交迴太白入月敵可摧敵可摧旄頭
滅履胡之腸涉胡血懸胡青天上埋胡紫塞傍胡無人漢道昌陞
下之壽三千霜但歌大風雲飛揚安用猛士守四方胡無人漢道

昌陛下至道昌二十
七字從本集補入

飲馬長城窟

釋子蘭

游客長城下飲馬長城窟馬嘶聞水腥爲浸征人骨豈不是流泉
終不成潺湲洗盡骨上土不洗骨中冤骨若不流水四海有還魂
空流嗚咽聲聲中疑是言

關山月

張籍

秋月朗朗關山上山中行人馬蹄響關山秋來雨雪多行人見月
唱邊歌海邊茫茫天氣白胡兒夜度黃龍磧軍中探騎暮出城伏
兵暗處低旌戟沙磧連天霜草平野駝尋水磧中鳴隴頭風急鴈
不下沙場苦戰多流星可憐萬里關山道年年戰骨多秋草

古長城吟

王翰

長安少年無遠圖一生唯羨執金吾麒麟前殿拜天子走馬長城
西擊胡胡沙獵獵吹人面漢虜相逢不相見遙聞鼙鼓動地來傳
道單于夜猶戰此時顧恩不顧身爲君一行摧萬人壯士揮戈迴

白日單于濺血染朱輪歸來飲馬長城窟長城道傍多白骨問之
耆老何代人云是秦王築城卒黃昏塞北無人煙鬼哭啾啾聲沸
天無罪見誅功不賞孤魂流落此城邊當昔秦王按劍起諸侯膝
行不敢視富國疆兵二十年築怨興徭九千里秦王築城何太愚
天實亡秦非北胡一朝禍起蕭牆內渭水咸陽不復都

長城作

鮑溶

蒙公虜生人北築秦氏冤禍興蕭牆內萬里防禍根城成六國亡
宮闕啟干門生人半爲土何用空中原奈何天下人骨肉尙酬恩
投沙擁海水安得不久翻乘高慘人魂寒日易黃昏枯骨貫折鐵
沙中如有言萬古驪山葬誰知野火燔

古築城曲 五首

元稹

年年塞下丁長作出塞兵自從冒頓強官築遮虜城
築城須努力城高遮得賊但恐賊路多有城遮不得
丁口傳父口莫問城堅否平城被虜圍漢斷城牆走

茲虜請休和虜往騎來過半疑兼半信築城猶差我
築城安敢煩願聽丁一言請築鴻臚寺兼愁虜出關

築城詞

張籍

築城處千人萬人齊抱杵重重土堅試行錐軍吏執鞭催作遲來
時一年深磧裏著盡短衣渴無水力盡不得拋杵聲杵聲未盡人
皆死家家養男當門戶今日作君城下土

築城詞 二首

陸龜蒙

城上一培土手中千萬杵築城畏不堅堅城在何處
莫歎將軍逼一作築將軍要卻敵城高功亦高爾命何勞惜

聽董大彈胡笳聲兼寄語弄房給事 李頎

蔡女昔造胡笳聲一彈一十有八拍胡人落淚沾邊草漢使斷腸
對歸客古戍蒼蒼烽火寒大荒沈沈飛雪白先拂商絃後角羽四
郊秋葉驚撼撼董夫子通神明深山竊聽來妖精言遲更速皆應
手將往復旋如有情空山百鳥散還合萬里浮雲陰且晴嘶酸雜

文粹卷第十二
鴈失羣夜斷絕胡兒戀母聲川爲靜其波鳥亦罷其鳴烏孫部落
家鄉遠邏迤沙塵哀怨生幽音變調忽飄灑長風吹林雨墮瓦迸
泉颯颯飛木末野鹿呦呦走堂下長安城連東掖垣鳳凰池對青
瑣門高才脫略名與利日夕望君抱琴至

文粹卷第十二

